

事記

3
下

南海廖維則堂家譜卷三下

藝文

續

壽序

傳

墓誌

行述

像贊

序

記

光緒壬寅聯壽序

嘗讀魯頌閟宮之詩曰徂來之松新甫之柏是斷是度是尋是尺此言宗廟之興修也俾爾熾而昌俾爾壽而臧此言壽考之衆多也是知根茂者實遂源遠者流長凡宗人之享大年膺景福者莫非先德所遺積善之家必有餘慶非偶然也良寶廖氏爲南海望族簪纓奕葉孝友傳家碩學者儒彪炳志乘十三世炎瑒公百有一齡特蒙

朝旨褒嘉旌其坊曰昇平人瑞國恩家慶閭里播爲美談壬寅孟冬重修祖祠落成因有聯壽之舉龐眉皓首蒼萃南海廖維則堂家譜卷三

一堂甚盛事也余不文愧未能表彰懿烈惟竊思報本之誠基於追遠尊祖之念推於敬宗晚近世風澆薄宗法陵夷養尊處優窮侈極欲及瞻其祠宇登其廟堂棟宇傾頽丹青剝落漠然視之曾不介懷情誼乖離可爲浩歎廖族爲海濱鄒魯淳樸成風勤儉相勸陋巷希蹤於顏子居室取法子衛荆惟於祖祠之修則不惜巨資成茲偉舉堂廡壯麗輪奐輝煌斯誠可以勵薄俗而樹風聲歟抑聞之美意延年仁者必壽祖德之昌茂如此家風之純厚復如彼登燕社之堂過絃歌之里衣冠氣盛詩書澤縣繼此以往超羣羣而享期頤者未有艾也絳縣高賢商山遺老豈得專美於前哉萬有千歲眉壽毋有害謹述詩詞以代頌禱

父老聞之當亦齟然而進一觴乎

光緒二十八年歲次壬寅孟冬穀旦

賜進士出身

誥授光祿大夫禮部尚書閩浙總督姻愚弟許應驤頓首
拜撰

賜進士出身

誥授奉政大夫 國史館協修翰林院編修加五級姻愚
弟何國澧頓首拜書

黼堂公七十雙壽序

恭頌

勅封文林郎黼堂三兄大人七表開八暨

勅封太孺人廖母麥太孺人七表開七雙壽榮慶序

生廖翔孝廉余典辛酉科廣東鄉試所得士也昔爲
星使尋五嶺之梅花忝附春官萃三城之桃李旣拔
茅而連茹遂因楂而及梨始悉其

封翁黼堂三兄焉今

皇上御極之二年同治癸亥廖生始會試旣南旋歸養袖
其

尊人節略句余爲文以壽之夫壽身者遇也壽世者德

南海廖維烈景譜

卷

三

也生將潔錢鏗之鼎濫王母之觴膾碧海之龍肝烙
丹山之鳳髓菖蒲九節媲美安期芝草三英追蹤用
里以是爲操長齡之券膺緝祉之符乎生曰否否籓
籓之鷄謝翼於丹青井谷之蛙息器於蒼澗抑古有
言曰先人有善而不知不明也知而不傳不仁也敬
佩禮經撰美之音無惜孔鼎垂銘之義用陳梗概上
瀆聰聞余攬之曰生其受授於庭訓者深耶何清芬
之可誦也原夫驚人三鳳我識其雛同母二龍君居
其季蔗旁挺而瓊漿早孕花晚開而玉萼非凡時則
堂上靈椿六旬猶健階前萱草兩秀齊芳乃嬌兒之
鶴骨方雛而生我之烏情失哺弱鍾父愛勤自人憐

每當螢夕待行鯉庭趨奉扶東坡之晚出竹外攜筇
隨太白之夜遊花前秉燭霜天讀罷代陸羽以烹茶
月夜遲眠助淵明之灌菊亦已孝思藻發養志苕年
矣然而相如家業實不中資楊震門風自來清白
封翁以車胤囊螢之暇承姜詩躍鯉之歡懼公孫牧豕
之勤輟季偉殺雞之奉卽拋鉛槧痔乃鉉基飲牛則
水漲三篙課鶴則田謀二頃况復伯兄服賈鮑叔全
虧仲氏遊庠鬻門篋鼓雖芹藻之休風已沐而桑榆
之晚景彌勤遂乃負耒勸耕橫經課讀綠楊聽鴈望
歲而樂歲偏多黃髮扶鳩培材而英材蔚起是以長
君榮膺特薦桂籍飄香次郎名列上庠雲程發軔而

南海廖維則家譜

卷

四

且羣工受範季子才多四代同堂孫曾林立宜其家
聲丕振壽考彌長是德是福可誦可銘也且夫戲中
庭之綵萊婦多賢彈陌上之箏羅敷自好故細君內
助則承歡之菽彌馨嘉耦好逑則合穎之禾易長乃
德配麥太孺人大家風範宿國名閨讀箴師推髻之妝
挖雅結同心之蘊當夫栗榛廟見桃李盈門侍伯鸞
則并日親操效敬姜則絲麻自績筠籃午饁中饋煩
司瓜架晨春宿糧早辦而又木連交讓簾前之妯娒
風和花愛合歡閨內之姑嫜日永旣而魚鱸疊兆麇
瓦分祥茶雖苦而備嘗蔗漸佳而已啖亦可謂媯天
盡補娥月常圓矣而猶儒素自安女紅無曠富能思

儉鮮雖旨而仍封安不忘勞狐自溫而每卻

封翁座常島集門有騶停

孺人藏酒需時拔釵同雅仁風洽處旁扇避債之臺膏
雨流餘時助比鄰之火此其璿閨龜勉福地駢臻宜
乎後嗣雲蒸能跨揚州之鶴德明星聚無慚荀氏之
龍也歟當廖生鄉薦時

封翁及

孺人勗之曰汝今幸叨科第皆先代積德所致才如靈
運陳祖德以名篇學到安仁述家風而作賦以故昔
年下第尙慰劉蕢一試無名不關張曙愈有以知

封翁清芬之可誦而生之受授庭訓者有自來矣歲逢

南海廖維則叢譜

卷

五

初度年逮古稀例編祝嘏之詞稍盡通家之誼八千
里魚箋遙遞添祝神仙海屋之籌

九重天象服榮膺長壯君子山河之色

賜進士出身翰林院編修辛酉科廣東鄉試正考官加五
級通家愚弟沈桂芬頓首拜撰

鹿儕公傳

南海縣志

廖牲字鹿儕龍津堡人少孤勤苦力學以舌耕養母年廿五補弟子員嘉慶廿二年丙子登賢書丁丑聯捷成進士需次工部授虞衡司主事遷營繕司員外郎都水司郎中逍遙畫省十餘年迹同大隱而利人濟物無刻去於心自西人牛痘入中國經種者痘症盛行不復再出萬一再出毒亦甚微可不藥而愈然廣東通行其法外省尙未周知牲託湖北布政使張岳崧專弁奇牛痘種至都復籌貲爲種痘人車馬飯食費借南海會館作公所屆期京城內外大小孩畢集挨次傳種其保全稚弱爲多粵省赴公車者廣人十之七郡會館狹不能容別租住房又艱旅費牲與

南海廖維則家譜

卷

六

邑人布政使吳榮光先捐廉俸爲倡由是通邑紳富踴躍捐題湊萬餘金購大宅於米市衙衙嗣後邑之赴試謁選及經商者客至如歸頓忘宦海征途之苦又於東直門外購置義園俾同鄉旅櫬有歸游魂無餒其桑梓情殷多類此在工部宣力多年以京察一等記名以道府用道光十八年授四川夔州府知府府扼長江咽喉西北貨物萃會郡守司權稅使應稅者畧爲走漏犯禁者稍弛防閑則所入自倍牲到任正查辦烟土之時恪謹奉公先後獲烟土千百箱聚而焚之以示嚴惡痛絕之意二十年丁內艱歸服闋補河南汝寧府知府尋奏署南汝光兵備道汝爲古蔡州地人強悍習戰爭匪徒捻子千百爲羣加以俗鮮蓋

藏樂歲餉米十錢凶年流離轉徙牲創社倉法己先捐廉
爲倡民亦相率捐助僅一載積米數十萬石復嚴緝捕重
購賞有馬萬山者名捕也以事繫獄廉得其寃並知其才
可用直母死縱歸治喪旋捐數百金爲贖罪馬感激誓縛
賊自効年內獲巨匪胡金堂徐升孫權曹不住等近百人
賊匪爲之斂迹此地方無事時措置之大略也咸豐二年
髮逆由湖湘下竄攻陷武昌漢陽汝郡之信陽羅山與漢
郡之孝感毘連牲聞警卽馳赴信陽調兵勇力扼武勝平
昌平靖三關逆知不能竄越乃間道繞汝郡而北牲尋奉
檄督辦 欽差糧台三年六月髮逆在北失利折而南連
陷西平遂平羅山確山四屬時汝郡無兵城復頽圯人心
搖動牲飭官親眷屬不許離城然後諭紳民告以禦賊只
有戰守法無逃避法連夜集丁壯脩城垣練軍火賊知有
備不敢攻時豫撫陸應穀與在籍紳士徐廣縉亦統重兵
駐汝辦防勦而四面皆賊文報不通沈邱正陽久被圍危
在旦夕迭經派兵應援皆畏賊數日不敢離郡城豫撫擬
退守汴梁舍藩籬而衛心腹適牲子慶謀以縣丞需次武
昌城陷單騎間關自楚走豫一路打探賊情以夜二鼓至
汝郡言賊初得武漢植基未固不敢離巢遠攻所以北竄
者捻匪爲之勾引耳然賊雖多但烏合故不攻堅而攻瑕
不取難而取易爲今計援屬縣卽以固郡城全郡城卽以
衛省會慎毋言退守退則聲勢一失不可爲矣牲大喜卽

令赴行臺述賊勢及如何進剿情形豫撫壯之據其言入
奏卽委牲會同直隸總鎮經文岱督兵解沈邱圍陣斬首
逆劉痴瘡委慶謀帶勇解正陽圍慶謀以賊多勇少乃選
精銳數百乘昏夜銜枚疾走偷薄賊營賊大驚棄營西走
沿途追殺陣斬桐柏縣戕官首逆王鉞鉞混名飛天王走
壁飛簷如履平地賊中誇爲萬人敵者也自兩縣逆匪蕩
平羅山等城陸續收復而各路捻子甚多一時難盡掃姓
乃薦鄭元善於豫撫言其人得民心識韜略與其困守一
隅不若調軍營當差庶足展其驥足元善者知正陽縣時
防勦最得力者也四年正月逆賊由金陵溯流而上武漢
已復者再陷牲念寇自南來逼切門戶郡境多平曠只羅
山縣峯巒重疊谿谷阻深足以控邊戎馬乃偕元善至羅
山因山勢壘石成牆袤延數千丈屹立如長城髮逆頻侵
軼皆拒退而捻匪之訐於北者已破黃安攻拔豫之光山
息縣矣牲乃派羅山屯長某復黃安命慶謀帶勇會同南
陽鎮邱聯恩復光山先約邱攻東門慶謀攻西北二門邱
始至失機爲賊所乘敗走信陽報至羅山震懼幾空城而
出牲急檄慶謀決死戰不許走走卽按軍法慶謀由西關
進與賊戰城外另分兵牽綴東南北三門以分賊力自卯
至酉血戰竟日發巨礮轟之賊不支奪門入累日不出偵
知賊欲走武漢求救於髮逆乘其未合出重賞募死士
夜登陴大呼殺賊賊崩潰開南門遁適邱鎮自南陽養銳

而來兵再振合同追賊慶謀繞出賊前來擊於文殊寺賊
大敗擒首逆王黨梁山振等光山平息縣賊宵逃二城遂
復是役也轉危爲安非牲鎮靜有謀知人善任不至此體
素強固自親履行間遂覺困頓又恐以衰年貽誤因薦元
善自代遂引疾歸值紅巾變亂之餘加以洋人騷擾宮室
焚毀冊帙無存方擬脩黌宮輯志乘未就而卒年八十二
牲與花縣駱文忠公秉章素莫逆又兒女姻親其南歸也
道湖湘冀一晤時駱移節西川經啟行矣遇於舟中駱聞
牲解組殊健羨歎曰余以不才謬當量寄時方多難白髮
憂邊欲隨子生入梅關優游井里豈可得哉若天憫其勞
事略就手挂冠神武息踵桑榆此至願也未知能遂否牲

曰此關乎福命矣吾祿位勛名多不如子而福命則寸有
所長我欲學子不能子欲學我正恐不配矣悵然而別論
者謂牲入居郎署出作遨頭雖晚年時事孔棘風鶴頻驚
卒之履險如夷身名俱泰福命誠不可及云

羽皋公傳

南海縣志

廖翱字鵬卿又字羽皋龍津堡人曾祖迪康以隱德聞於鄉前志有傳翱少英俊弱冠以文名讀書觀大略不屑屑章句務期內有得於己外有濟於世嘉慶廿四年己卯科舉鄉試第一道光六年丙戌會試成進士出宰山西定襄縣到任歲值大飢米石萬錢市價猶騰踴不已男女啼飢者塞縣堂幾不可出入翱亟請發倉平糶又念發倉時不及且不遍乃先捐米百餘石爲富民倡由是縣民絡繹捐輸自白金至數十金不等翱又先懲奸民之勒捐逼賑者以保富故富室皆欣然樂從更弛關市之禁以廣招來於城廂市鎮多設粥廠使領米者無奔走擠擁等候之虞而

南海縣志

卷

十

或粥或米或錢地方情形不同各聽其便并多派紳富董事不更胥吏之手已親至稽核其間自壬辰九月至癸巳三月樹葉菜甲漸生可資接濟乃止救活飢民無算初翱之請平糶也向例照時價減十之三翱謂米石多至錢七千中人稍蒙其恩下戶安受其惠曷若官糶減一二千之入民糶少一二千之出乎遂抑低市價以報大吏素惡翱崛強不附已及是見他邑米價昂襄獨否疑冒賑肥己委員按之岌岌乎將得罪百姓恐翱去如嬰兒之失慈母也走白於委員鳴其故卽商賈米行亦具結所報時價屬實并無高下事得寢然翱本儒吏簿書期會不甚關心於民事外以正學術振文風爲務初時紳士請建尊經閣纂邑

志曰未暇也姑待之三年後政平訟理上下交孚乃捐俸
百金爲倡通縣僉題爲應遂定基址揆法度堂宇廣闢軒
窗開豁更購十三經廿一史通考通典等充牣其中便諸
生披覽其言曰士人束髮受書皆務求通然通者非能作
八比博科名之謂能洞然於學術盛衰政治得失之謂也
所以使之通者經史是也無經史以引之雖面壁十年何
由自悟今人目無寸書見不類字如奚居之駭鐘鼓何暇
與談學術乎其言如此邑志未能倉卒成先爲序例一卷
大抵監邑志之濫關乎襄邑者存之否則棄之其關於人
心風俗者詳之否則略之惟求典核不務闕博其脩書也
一如治民殆性情如此自辨賑後大吏聞其賢擬以卓異

保舉調煩劇翹謂邑小易治久之任與民相信則教易行
忽遷他邑非吾志也正月晉省辭保舉以暴疾卒於太原
年五十二翹好陸王之學但求有得於心讀書不拘傳注
而飭身厲行卻極謹嚴不蹈姚江末流之弊當其齟齬於
上官也鄉試座主吳侍郎其濬騰書當道繩其美直其冤
當道悟轉遏抑爲掄揚翹色如平時不加愠喜其族弟姓
官京師恐其直情徑行不曉周旋人事勸爲書謝侍郎兼
有問餽以答厚意翹閱書畢謂邑人李彪元曰官場習氣
最易染人吾與侍郎有師生誼縱有問餽豈曰苞苴然行
之前時則可行之今日則不可如鹿儕言侍郎爲賣人情
我爲買薦書矣不兩失乎鹿儕姓別字也身後囊橐蕭然

藉紳民贖助乃克返櫬行弔日白衣祭奠者人多署不能容至拜哭於門外而去衆議欲祀於名宦祠以格於例不果遂祀於晉昌書院

論曰荒僻之地欲讀無書雖有秀質長材踟處一隅無自擴其聞見吳中丞榮光官黔中首刻經史以惠士林意亦如此然吳本以文學爲侍從入居臺閣出擁節旄登高而呼其應自遠翱以區區令長有志絃歌之化則尤難耳吾聞父老言翱在定襄有幕下士爲小底毒斃竊貲以逃者邑人恐官以失死囚獲咎也詳問囚年紀狀貌分遣子弟守關隘譏察之不數日縛囚至蓋民待官如父兄官亦待民如子弟故所以教誨之者無不至也漢朱邑有言吾死

宜葬桐鄉子孫愛我不如桐鄉人嗚呼豈不信哉

雨帆公傳

南海縣志

廖翔字能英號雨帆龍津堡人孝友嗜學由縣學生中咸豐十一年辛酉科舉人大挑以知縣用分發廣西加同知銜同治十二年署馬平縣事馬平當衝要翔廉以自持亦廉以奉上提督兵勇往往擾民嘗嚴懲之馬平慣抗糧翔剴切開導糧悉征如額旋丁父憂而馬平抗糧至煩兵調巡撫涂宗瀛提督馮子才言曰廖令勤政愛民使其在任必不至此光緒三年服闋還桂林適歲歉命往賑旋辦南甯三江口釐稅四年十月補陸川縣知縣陸川民好訟翔爲釐積案俗遂變八年以積勞病卒春秋六十有四

雲臺公傳

南海縣志

廖慶謀字文輝號雲臺龍津堡良寶鄉人父姓夔州府知府前志有傳慶謀髫齡讀書日十行下隨任夔州賃僧舍下帷攻苦留心經世之學習申韓術晨夕騎射打靶技擊絕人能舉三百筋石白由報捐縣丞補湖北公安利川縣丞咸豐元年拿獲信陽州確山縣盜徐萬林等奉旨以應陞之缺陞用并加二級旋報捐知縣留湖北候補三年髮逆陷武昌部議候補人員降二級調用奉旨革職復降捐縣丞由軍功歷保至道員用賞換花翎同治元年擒斬洪甯捻匪劉中路御史呂序程河南巡撫嚴樹森以妄戮無辜參奏有旨革職永不叙用欽差大臣勝保河

南海廖維則家譜

卷

十四

南巡撫鄭元善疊臚戰功保奏奉旨著注銷永不叙用字樣留勝保營差遣時汝郡紳民赴汴逮呈撫院爲慶謀辨冤者百數十起未幾父喪歸先是髮逆陷武昌慶謀由楚走豫值髮捻交通圍正陽城豫撫擬退守汴梁慶謀言賊烏合不足畏援屬縣卽以固郡城全郡城卽以衛省會毋言退守失聲勢豫撫壯之委帶勇援正陽慶謀以賊多勇少乃選精銳數百乘夜疾走薄賊營賊大驚棄營走追斬首逆王鉞解正陽圍八月奉調至固始息縣勦辦李士林先後擒獲捻首胡玉虎徐世篤等九月髮匪復竄武漢奉委在羅山九里大勝兩關防堵捐築土城數百丈脩築石門設立關隘髮逆不得竄越四年九月羅山撤防奉委

勦辦汝光兩屬擒匪擒斬首夥千餘教匪數十名五年正月奉調至陳州防堵旋以髮逆復竄武漢再調至羅山兩隘防堵四月光州擒匪李兆受王黨戕官圍城攻陷光山平息二縣奉檄與南陽鎮邱聯恩會剿聯恩先至爲賊敗軍械盡失慶謀由西關進與賊戰城外又分兵牽綴東南北三門以分賊力血戰竟日賊奪門入累日不出偵知賊欲走武漢求救於髮逆乘其交未合募死士夜登陴大呼殺賊賊開南門遁慶謀繞出賊前來擊於文殊寺擒首逆王黨梁山振等復光山平息二縣七年擒匪圍攻固始奉檄援勦攻克方家集南岸賊巢八年擒首蕭曠破鹿邑亳州戕官據城以叛檄慶謀赴勦擒斬之又勦平西蘆教匪

南海廖維則家譜

卷

十五

十一年美英法夷犯 京師大吏派慶謀帶兵入衛和議成回豫督辦南汝光團練劉中路者汝擒渠魁黨羽逾萬投誠後常懷反側汝有陳紳與通約期舉事汝甯知府祁之銓聞耗不能制專弁邀慶謀到汝會商憑線人圍陳紳宅搜夾牆中得劉之銓以劉黨衆解省恐有變因就地正法陳紳以劉在其家捕得大懼出貲徧賄當道求解此呂序程嚴樹森誣參之所由來也樹森前官湖北知縣有案查辦慶謀爲楚督文巡捕剖白之事得寢及撫豫頗忌慶謀知其隱事亟思去之羅山有呂牛娃子者爲楚豫間積惡大愆慶謀在汝時擒磔之牛娃子爲呂序程服叔故惡之如此自奉 旨革職慶謀卽擬歸川督駱秉章招往蜀

辦軍務辭不往僧格林沁督師山左勝保督師陝甘均飛
章奏調之豫撫鄭元善以需才奏留兼爲開復慶謀辭僧
鄭而赴勝營呂序程再摺誣參勝復疏辨奉 旨免查辦
慶謀在營與士卒同甘苦遇傷夷親視醫藥然紀律最嚴
犯擄掠者斬以徇師行秋毫無犯遇軍餉乏或連日不得
食村氓爭造飯爲餉有親送至左右者歷署羅山正陽縣
光州直隸州事題補滎陽縣知縣特授汝陽縣知縣在任
不用幕友案牘親自批發派親信下鄉偵探鋤姦摘隱明
察若神下鄉圍捕不帶書差自募親軍盜賊喪膽其吏才
如此返里後絕意仕進不謁當道粵撫郭嵩燾廣州知府
馮端本皆與慶謀有舊郭屬以廣屬捕務力辭不就馮欲
南海廖維烈家譜 卷 六

見之卒不得見左宗棠督師陝甘邀慶謀偕行以母老辭
許應鑠任江西吉南贛甯道以洋藥稅疲甚邀至署商權
慶謀以至戚不獲辭爲建築在各屬設旱卡二十餘處私
梟不得繞越歲增課數萬以贛郡宜蠶業言於許設蠶業
局許擢蘇臬浙藩邀慶謀襄辦公事公餘與德清俞樾唱
和結白蓮詩社徧遊太湖木瀆西湖靈隱錢塘山陰諸勝
山東水旱捐棉衣千件助賑傳 旨嘉獎未幾卒於家年
七十九著有宦遊隨筆思補齋詩存弟全字清輝號月臺
姓守汝南全隨侍任所從學於同邑徐大令台英聰穎過
人熟於諸史工書法時髮捻披猖南北道梗不得試於有
司全不屑意科第投筆起軍旅先是張曜權固始髮逆合

擒首大股圍縣城豫撫知事亟檄鄭某帶勇助張防堵鄭時在汝南辦團邀全同往全請命於父與鄭偕是時寇氛甚惡親戚故舊咸危其行全以鄭與父兄交誼厚義不可卻卒偕鄭往固始前後三次被圍賊不得逞全與有勞事平奏保 賞戴藍翎旣而兄慶謀奉勝保檄赴皖助勦全偕行謁勝面陳平髮擒策勝奇賞之留參軍事後擒陳逆王成率用其計奏保以縣丞歸部選用旋偕鄭赴歸德府陳州辦防勦事宜遠效平奏保免補縣丞以知縣歸部選用並加同知銜又以擒逆據柘城等州縣徑撲省城復據中尉歷著戰績奏保 賞換花翎全爲人恂恂儒雅遇事變明敏果決中興將佐方倚重之旋以老父八旬告休隨侍歸里不復出著有皖豫從戎日記藏於家

禹臣公傳

南海縣志

廖震字芸芳號禹臣江浦司賀豐鄉人自幼讀書以聰穎聞事父母孝謹能先意承志十餘歲以家貧乏養卽舍業服賈熟精算術常於紛紜酬酢中耳聽目視口講手算無或錯者人皆服其能而誠懇篤實莫不聞名而心許數年間用是致富所以就養父母者無微不至遂營寢宇蓄書籍爲閉門侍奉誦讀計未幾丁父艱哀毀逾禮而貨殖亦遭折閱家道中落加以生齒日繁遂不復如所願而暇日未嘗不手一編好觀乙部書恆舉以訓子母李氏春秋高震不敢遠離夜必數起省視母有手足疾歲凡三四發震以少年豪飲亦時患足痛震每痛時母在家恍若有覺母疾發時震在外亦未嘗不覺也其母子間感應有如此性好施與調恤親友惟欲是給雖典質不吝族人之貧者爲之謀生計立家室絕無德色其他飲食教誨俾至成人者比比也有友某歲暮貧困求援時值嚴寒震脫狐裘與之其篤於親誼大率類此番禹陳澧講學羊城震遣其子廷相從之遊勛以篤志力學無負師門其後廷相道德文章卓然成立皆本於庭訓也廷相舉於鄉時震勉之曰科名以人重無以一第自矜及入詞林猶諄諄以顧名思義實事求是爲訓時人服其貽謀之善云

澤羣公傳

謹按國史館續廣東通志宣統南海縣志俱為澤羣公立傳番禺續志亦列入寓賢傳茲專錄史館一篇尊國史也

廖廷相字澤羣又字子亮廣東南海人縣學生同治庚午舉人光緒丙子進士改庶吉士授編修先世讀書有隱德父震以貧故業賈而未嘗廢書擇有用者購藏於家庭相少好學得縱觀焉行狀同治間番禺故五品卿銜陳澧以老師大儒為學者宗仰廷相弱冠往見論音韻大嗟賞之招至家飲食教誨之數年學大進湖南故編脩謝維藩負時名典廣東鄉試得廷相卷喜甚置前列榜發入謁知為績學寒士益慶得人命酒與談饋白金為會試費辭不受則

南海廖維則家譜

卷

九

曰留備庭闈甘旨可也梁鼎芬所撰墓表江蘇故中允劉熙載有

碩望督學廣東廷相為所取士赴會試陳澧付以書合修謁云嶺南學術振起必屬此生中允見而信然遂蒙國士之知陳澧東塾隨筆迨入都故大學士張之洞在翰林聞名相思

語人曰廣東來一顏子公等見之否旋入翰林故順天府尹梁肇煌聘都下達人宿學修府志推張之洞為領袖廷相與焉書成讀者以為得史法其為海內師儒賢達賞譽推重之如此譚宗浚希古堂筆記生平受學於陳澧最親且久篤守

師法於澧所說漢宋學術無偏重不當各立門戶數語持之最堅凡經史百家書博觀約取務得其要南海縣志小學古音切韻輿圖算術無不綜覽詳究而所長尤在三禮嘗謂

學禮當識禮意禮家書浩博禮文繁重學者苦之乃編纂
三禮表以類相從釐然具列使得從其文以求其意爲學
禮者示以階梯治說文謂當通古文大小篆篇中九千字
依次手寫日有課程又謂國朝諸儒闡發古音部分各異
段玉裁分十七部獨爲適中嘗取諸經及古書之有韻者
依聲牽貫之以證段說之合江永戴震二家書言古音不
無牽混則著說辨正之少時卽深通切韻不信等韻家拘
守之說陳澧著切韻書成屬之校勘爲摘其誤者八條澧
大喜從之謂深得教學相長之益地理以圖爲切要光緒
中奉詔修會典行取各省輿圖大吏延爲總纂確考精繪
以進廷議嘉焉嘗言算術日新月異雖古不及今然源不

可忘當追溯前古以遞通後出之新法所說具有本末陳
澧著三統術詳說中有闕略爲仿本書體例補成完帙自
著書甚夥已成者禮表十卷羣經今古文家法考一卷粵
東水道分合表二卷順天人物志六卷廣雅答問六卷讀
史劄記文集各若干卷最後著安攘錄一編則以時艱日
棘外侮紛至爲是懷忠憂國之作采輯自古至明代中外
交涉事見於經史及羣書者分門編錄萃歷代之機變權
謀考其得失庶幾得所依據因時變通爲禦侮自固之助
削稿迄未就此尤惓惓於用世發憤著書之深意也狀行在
翰林日閉戶自精恥於干進未幾遂歸兩廣總督張人駿奏片 歷主
金山羊城應元廣雅各書院講席爲學海堂菊坡精舍學

長而在廣雅之日尤多院爲張之洞督粵時所創建分經

史理文四科課士日與諸生講貫陳宗穎所撰墓誌宗旨純正成

就甚眾奏片凡學者問難輒曉以數要言不事繁稱卽相悅

以解論者稱爲盡得其師陳澧之傳故出其門者久而益

服從之不惑於近時詖邪之新說病歿爲請於官祀之嶺

學祠以永追慕行狀體素弱砥志讀書飲食起居皆有常精

氣內斂日以漸健性澁默敏悟不苟言笑而辭氣則冲然

以和墓表操履端潔奏片不預外事人不敢干以私而遇當爲

當言者則力任之抗辨之無所避自奉省約無鮮衣美食

而調人之急無吝色篤於風義在京時嘗獨力歸房師故

編修黃湘之喪并其家人於蜀人稱爲難能南海縣志初父震

南海廖維烈墓譜

卷

三

業賈致小康性慈厚慷慨好施親族貧者多依之後中落

弗改廷相供職翰林俸薄不足資祿養及父憂歸家益窘

歲以脩脯自給仍節縮之以恤親族一如父在時自是累

於境不復出以教士著書終其身光緒二十四年十一月

卒年五十有五未及中壽不得盡其才滿其志也嗚呼惜

哉陳宗穎所撰墓誌

附錄兩廣總督張人駿奏片

再廣東縉紳世多賢哲而其人已往其事足徵就臣

見聞所及者得四人焉一原任鴻臚寺卿鄧承脩歸

善縣舉人志節清亮直言敢諫官御史日前後所上

封事數件悉關於國計民生臣同在諫垣日與砥礪

見其指陳時事抗論人材自愧不及光緒十一年以
母老陳請終養先朝知其忠直不合開缺給假省親
未經成行奉旨派往廣西畫界感受瘴癘憂憤焦勞
事定多所補救回京覆命仰蒙孝欽顯皇后德宗景
皇帝面諭褒嘉未幾仍乞病歸主講惠州豐湖書院
多士信從旋以病發猝故深堪悼惜其母尚存年八
十有二暮年思子情殊可憫一翰林院編修廖廷相
南海縣進士操履端潔學問精深從學菊坡精舍山
長番禺舉人陳澧盡得師傳該員書外無嗜好於三
禮水經音韻諸學博收約取都有成書在翰林日閉
戶自精恥於干進未幾遂歸主講廣雅書院多年宗

旨純正成就甚衆人咸推爲經師後以病沒士林追
慕無已一戶部候補主事潘存文昌縣舉人人品高
峻學識深遠咸豐年間供職部曹不干謁權貴沈淪
數十載未得補官賦性嚴直狷介與人談論時事至
於泣下旋以老病乞休回里講學主持風教發抒忠
愛閭巷咸資觀感風俗爲之一變陞任督臣張之洞
最敬其爲人至其懷抱之宏論義之精天下大勢瞭
如指掌尤爲人所難及惜未一試以病卒於家一生
員陳樹鏞籍隸新會縣秉性肫摯學問淵通爲番禺
舉人陳澧門人年少才美驚其儕輩其學貫通四部
而鄭康成司馬光朱熹三家之書尤爲專精於經則

知微言大義之所存於史則知治亂興衰之所在講習里閭從游衆多生平抗懷經世拳拳忠愛每飯不忘而耿介自持堅苦卓絕求之今日尤不多得事父至孝父沒居廬白衣茹素一守古禮以哀毀得病尋卒儒林學子靡不嗟嘆以上四員人皆稱爲君子歎賢哲之已逝愛公論之可憑臣詢訪旣真未便任其湮沒合無仰懇天恩俯准將已故鴻臚寺卿鄧承脩翰林院編修廖廷相戶部主事潘存新會縣生員陳樹鏞生員學行事蹟宣付史館立傳以風當世如蒙俞允再飭地方官取具各該員履歷事實咨送史館查核辦理至鄧承脩一員因畫界受瘴回籍後瘴發身故當時未經奏報可否加恩賜恤並飭下地方官隨時存問其母用彰蓋績而恤耆年出自鴻慈逾格謹附片具陳伏乞聖鑒訓示謹奏

宣統元年五月二十日附片具奏六月二十日奉硃批著照所請該衙門知道欽此

錫茲公傳

續廣東通志

廖廷福字錫茲南海人性伉爽長於文學詩尤沈著陳澧主講菊坡精舍以題黎美周黃牡丹圖命題廷福成七古一首有幸分心血作詩人不教盡染虔州草之句蓋美周殉難於虔州也澧擊節歎賞稱爲壓卷是圖存仁和王存善家存善請澧題詠澧作詩話一則稱述此句跋於圖後其爲前輩所推許如此著有紅藥山房詩稿二卷詞稿一卷尤精於詞曲撰述甚富與李笠翁蔣心餘相韻頽然以爲雕蟲小技不輕示人故無傳於世豪於酒每飲必盡數巨觥遂殞其天年士林惜之

羽帆公墓表

廷相

公諱翔字能英羽帆其號也先世自河南中州遷廣東南海遂爲南海人祖諱玉瑩考諱龍光龍光有兄曰龍泰無子遂命公爲之嗣自考以上隱居耕讀潛德弗耀以公貴封贈如其官公性孝友善承先志幼嗜學年二十九補弟子員食廩餼年四十二中咸豐辛酉科舉人設教省城循循善誘出其門者多知名士同治十年大挑一等以知縣用分發廣西加同知銜十二年委署馬平縣事馬平爲柳州首縣地當衝要缺旣瘠苦而送往迎來絡繹不絕同城有道府有提督公廉以自持亦廉以奉上故上游益重焉提督兵勇恆出擾民公嚴懲之兵勇爲之奪氣馬平民頑悍抗糧者屢數任矣公剴切開導咸樂輸將莅任八月而數年之糧悉征如額旋以丁龍光公憂解任而馬平抗糧如故至煩兵調數年始平時值涂撫軍宗瀛巡邊馮軍門子材言曰廖合勤政愛民使其在任必不至此嗚呼此可以觀公之政矣光緒三年服闋復到廣西適歲歉大吏命公往賑旋委辦南甯三江口釐務以八成計釐商民便之而贏數比前更夥蓋法立而弊清故也四年十月補陸川縣知縣陸川民俗好訟公以至誠相感動復爲清釐積案俗遂變民戴其德闔縣爲公壽公固卻之又預爲公母麥太宜人壽蓋欲公久任斯土故喜懼交集也大吏通行州縣積穀備荒多視爲具文公先捐廉俸開局故民咸樂從

凡一年捐穀四千餘石分團各堡并爲之立法善後推廣
義學民利賴焉公尤好教士其莅陸川及馬平公事餘暇
輒進書院諸生講讀書作文之法親爲評閱課卷必斟酌
盡善而後已故鄰縣之士亦多來就正者其得士民心如
此八年六月奉調簾差以積勞病卒桂林寓舍春秋六十
有四公凡兩宰劇縣措施裕如一養一教無非因勢利導
而所居民樂所去民思此以知儒術之可大用惜乎其遽
以縣令終也原配李宜人繼配梁宜人皆先公卒九年正
月公子必鑑必昌奉公柩歸與李宜人合葬於銀牛岡之
原旣窆以狀來請題其墓門之石廷相於族屬後公數輩
又辱公教誨最久義不敢辭公之善政不勝書書其榮榮

大者俾後之人有所觀覽焉

雲臺公行述

公諱慶謀又名長慶字文輝號雲臺鹿齊公長子也縣志有傳髫齡讀書日十行下隨父夔州府任賃僧舍下帷攻苦留心經世之學晨夕騎射技擊絕人能舉三百斤石日納粟得縣丞職補湖北公安利川縣丞咸豐元年擒信陽州確山縣盜徐萬林等旋由軍功歷保至道員同治元年擒斬洪甯捻匪劉中路御史呂序程河南巡撫嚴樹森以妄戮無辜參奏有旨革職永不敘用 欽差大臣勝保河南巡撫鄭元善疊臚戰功保奏奉旨著注銷永不敘用字樣留勝保營差遣時汝郡紳民赴汴呈撫院爲慶謀辨冤者百餘人未幾以父喪歸先是髮逆陷武昌慶謀由楚走豫值髮捻交通圍正陽城豫撫擬退守汴梁慶謀言賊烏合不足畏援屬縣卽以固郡城全郡城卽以衛省會毋言退守失聲勢豫撫壯之屬率兵援正陽慶謀以賊多兵少乃選精銳數百乘夜疾走薄賊營賊大驚棄營走追斬首逆王鉞解正陽圍八月奉調至固始息縣勦辦李士林先後擒獲捻首胡玉虎徐世篤等九月髮匪復竄武漢奉委在羅山九里大勝兩關防堵捐築土城數百丈修築石門設立關隘髮逆不得竄越四年九月羅山撤防奉委勦辦汝光兩屬捻匪擒斬首夥千餘教匪數十名五月正月奉調至陳州防堵旋以髮逆復竄武漢再調至羅山兩隘防堵四月光州捻匪李兆受王黨戕官圍城攻陷光山

平息二縣奉檄與南陽郡邱聯恩會勦聯恩先至爲賊敗軍械盡失慶謀由西關進與賊戰城外又分兵牽綴東南北門以分賊力血戰竟日賊奪門入累日不出偵知賊欲走武漢求救於髮逆乘其交未合募死士夜登陴大呼殺賊賊開南門遁慶謀繞出賊前夾擊於文殊寺擒首逆王黨梁山振等復光山平息二縣七年擒匪圍攻固始奉檄援勦攻克方家集南岸賊巢八年擒首蕭曠破鹿邑亳州戕官據城以叛檄慶謀赴勦擒斬之又勦平西蘆教匪十一年美英法夷犯京師大吏派慶謀帶兵入衛和議成回豫督辦南汝光團練劉中路者汝捻渠魁黨羽逾萬投誠後常懷反側汝有陳紳與通約期舉事汝甯知府祁之銓

聞耗不能制專弁邀慶謀到汝會商憑線人圍陳紳宅搜夾牆中得劉之銓以劉黨衆解省恐有變因就地正法陳紳以劉在其家捕得大懼出貲徧賄富道求解此呂序程巖樹森誣參之所由來也樹森前官湖北知縣有案查辦慶謀爲楚督文巡捕剖白之事得寢及撫豫頗忌慶謀知其隱事亟思去之羅山有呂牛娃子者爲楚豫間積惡大憝慶謀在汝時擒磔之牛娃子爲呂序程服叔故惡之如此自奉 旨革職慶謀卽擬歸川督駱秉章招往蜀辦軍務辭不往僧格林沁督師山左勝保督師陝甘均飛章奏調之豫撫鄭元善以需才奏留兼爲開復慶謀辭僧鄭而赴勝營呂序程再摺誣參勝復疏辨奉 旨免查辦慶謀

在營與士卒同甘苦遇傷夷親視醫藥然紀律最嚴犯擄掠者斬師行秋毫無犯遇軍餉乏或連日不得食村民爭造麥飯爲餉有親送至左右者歷署羅山正陽縣光州直隸州事題補滎陽縣知縣特授汝陽縣知縣在任不用幕友案牘親自批發派親信下鄉偵探鋤姦摘隱明察若神下鄉圍捕不帶書差自募親軍盜賊喪膽其吏才如此返里後絕意仕進不謁當道粵撫郭嵩燾廣州知府馮端本皆與慶謀有舊郭屬以廣屬捕務力辭不就馮欲見之卒不得見左宗棠督師陝甘邀慶謀偕行以母老卻之許應鏢任江西吉南贛甯道以洋菸稅疲甚邀至署商榷慶謀以至戚不獲辭爲建策在各屬設旱卡二十餘處私梟不

得繞越歲增國課數萬以贛郡宜蠶業言於許設蠶業局許擢蘇臬浙藩皆邀慶謀相助公餘與德清俞樾唱和結白蓮詩社徧遊太湖木瀆西湖靈隱錢塘山陰諸勝山東水旱捐棉衣千餘件助賑傳 旨嘉獎魯撫張曜馳書聘請以老疾辭年七十有九卒於家著有宦遊隨筆思補齋詩存

月臺公行述

公諱全字清輝號月臺鹿儕公之三子也鹿儕守汝南全隨侍任所從學於同邑徐大令台英聰慧過人熟於諸史工書法時髮捻披猖南北道梗不得試於有司全不屑意科第投筆起軍旅先是張曜權固始髮逆合捻首大股圍縣城豫撫知事亟檄鄭某帶勇助張防堵鄭時在汝南辦團邀全同往全請命於父與鄭偕是時寇氛甚惡親戚故舊咸危其行全以鄭與父兄交誼厚義不可卻卒偕鄭往固始前後三次被圍賊不得逞全與有勞旣而兄慶謀奉勝保檄赴皖助勦全偕行謁勝面陳平髮捻策勝奇賞之留參軍事後擒陳逆王成率用其計奏保以縣丞歸部選用旋偕鄭赴歸德府陳州辦防勦事宜逮枚平奏保免補縣丞以知縣歸部選用並加同知銜又以捻逆據柘城等州縣徑撲省城復據中尉歷著戰績全爲人恂恂儒雅遇事變明敏果決中興將佐方倚重之旋以老父八旬告休隨侍歸里不復出著有皖豫從戎日記藏於家無子以兄慶謀第七子杞齡嗣

虞階公崑圃公行述

尚謙

十八世虞階公諱錫池字桓植號仁山國學生名麟瑞十七世佩堂公長子也公篤志好學少有文名專習尙書老能成誦與羽皋伯鹿儕伯秋渠叔少同遊長同學羽皋伯有四子讀書序嘉慶十三年戊辰在明軒祠同館時所撰也有云誠能發奮自勵自立功課讀經讀古文詩賦每日各有程限不可間斷暇則博覽鑑史子集以資見識倘有所得或有所疑則質之同志以求其是其操修可見矣屢試未遇絕意進取嘉慶十九年甲戌七月退居於上市中和當焉崑圃公其弟也諱錫濤字瑜植號恬波例贈翰林院待詔名麟徵性孝友心忠誠少年別業服賈羊城以恢家計旋眷念友于不忍久別道光八年戊子回鄉與璇植叔在村邊築寄園一所山環水抱帆影漁歌古木遮天濃陰匝地綠竹千竿紅荔數樹亭臺橋榭雜然前陳常與諸昆仲詞人故舊偃息其中或觴或詠步月看花或釣或棋高談雄辯地僅畝許妙景天然道光十三年癸巳羅村基圍頽堤西潦漲滿傾塌房屋花木毀傷後尙廉兄修葺數楹以爲燕居之所而公孔懷志切未復興修道光十五年乙未三月在上市設保生堂藥店兩公偕隱於市晨夕聚處有壘篋之樂方虞階公之在中和當也生意興隆管晏風範道光中年盜賊蠶起商店半爲擄掠獨上市合順當中和當維持應變保守無虞中和當地勢軒爽有園池有

花木縉紳先生日與交遊博覽經史談論文章銜杯吟咏歌嘯隨之數十年以爲常如孔北海所謂座上客常滿樽中酒不空者也公亦談諧言之必正疾言遽色未曾施於人鄉黨賴其整飭族事藉其調和排難解紛愛人利物一言而人悅服其視族事如己事如此堂內子姪在省職業每回家必先來謁教以勤慎勸以謙和諄諄戒諭必留膳乃去至於建造文閣祠宇道路基圍賑災借貸皆有父遺風無足爲公異者細圍修築需鉅費公力任之至今鄉人尙津津樂道焉咸豐四年甲寅二月廿七日午後在中和當卒然起病是夕肩輿回家子四人諸孫林立奉養湯藥日夕不離五月初七日戌時去世享壽六十有九是年六

南海廖維烈家譜

卷

三

月十二日佛山匪起四方繼之村場市鎮遭其焚劫而公已撒手塵寰此亦公之福澤有以致之也崑圃公於七月中旬先與諸子姪避地省垣之河南天益茶行是冬有寇至攻城者勢甚劇幸未破城莫大之福十二月公扶病由禪回家往來水陸病體沉重咸豐乙卯五年正月廿五日子時去世享壽六十有九至合葬日期則咸豐丙辰六年四月廿三日也兩公氣誼相孚肫誠樂善始終未有析產白首怡怡余侍奉多年習見習聞毫無飾說語無倫次安敢出以示人不過道其實事而詳記之懼其泯沒無以昭茲來許耳

彝卿公行述

覲廷

君諱國華字尚德號彝卿虞階公之長子也少失恃事繼母羅孺人能得其歡心甫弱冠棄儒而賈時 虞階公退隱鄉市隨 叔父崑圃翁經商於羊城君雖習賈然慷慨有大志不屑錙銖計較庚寅歲鹿儕叔省親假滿還都君乃慨然曰大丈夫須讀書萬卷入詞垣掌制誥顯親揚名不然當棄毛錐立功沙漠如班定遠故事兩者不能亦當行萬里路以開豁胸襟展拓眼界必效庸俗子作案瑩株兔老死不出閭里負卻弧矢志矣 鹿儕叔奇之遂偕遊京師南踰吳越北走燕趙所歷如灘隴之險鄱陽大江之深且廣虎邱西湖之名勝岱宗之高太行之綿互城堞之

南海廖維烈家譜

卷

三

巍巍宮闕之壯麗冠蓋之輻輳車馬之縱橫皇皇乎極天下之大觀也盤桓三年倦遊知返壬辰歲南歸復賈於羊城以養親教弟爲事是時 崑圃翁退隱鄉市與 虞階公伯墳仲篋倡和無間家務大小悉以委 君君亦不忍以細故貽老人戚內外經理罔不井井 君異母弟三人初從弟六人或士或商無舍業嬉者 兩翁亦顧而樂之 君有至性以生母早背不克逮事言輒嗚咽故以繼母益加孝養每返里必捧盤匭潔甘旨偕諸弟侍食母側數十年如一日焉待人誠懇周到告乏必與不吝不倦而於寒士尤致意舉止安詳言論溫雅望而知爲金玉君子作事慎密不動聲色且有巧思隨用小器物皆精緻可觀甲

寅夏六月匪亂 君時讀禮家居竊計從逆者皆迫於飢寒不過圖朝夕升斗耳卽日鳩工浚涌首捐銀若干計科分派工賴以濟各人因有口糧資給不至四出爲盜偶遇外警一呼卽集古人將工代賑策莫善於此 君體弱多病且大故之後遭時艱難內憂外患迭起交迫經畫措注殫精竭慮積勞成疾遂至不起生於嘉慶丁卯十二年十月念二日午時終於咸豐乙卯五年二月初五日辰時享壽五十有一歲惜哉 君立身行事有倫有脊至於孝友敦篤人言不間尤可風世勵俗云

容卿公行述

公諱椿齡字貢廷號容卿雲臺公之四子也幼通經史工吟咏少從朱香溪先生遊習申韓術旋入山東張中丞曜幕下佐治軍民要政成績昭著報捐知縣歷任河工等差署理厯城縣左堂專以勞績奏保加同知銜直隸州用年五十卒於山左公寓現存四子長元勳次元杰皆山東武備學堂畢業三子元照四子丙午均能以詩禮世其家孫一人和基元杰出

斌卿公行述

公諱柏齡庠名桂華字達廷號斌卿晚號月湖雲臺公之五子也年二十三棄童子業與兄容卿從浙省朱香溪先生游習申韓術通達治體旋爲魯撫張曜羅致幕下歷供河工礦務等差以勞勩奏保補縣丞加五品銜光緒丁酉奉委辦賑捐差歸粵甲午歲試補弟子員長於經世學爲張惲兩學使所嘉許取列一等晚年淡於進取隱居不出年六十卒子四元炘元熙元燿元焯孫一名和基燿焯幼殤

閻卿公行述

公諱祀齡字顯廷號閻卿雲臺公之七子也少聰穎不沾沾於章句之學棄儒就武得補守備歷充廣西懷集稅廠差子元燾

虞階公像讚

灼

屏去名念退居市廛不營苟得不爭物先履巽思順行左
智圓植德於厚多福自延安安乎處世俗之中能超塵俗
之表矯矯乎居今人之後力追古人之前

羅孺人像讚

虞階公繼妣

曹氏大家能完漢牘蘇家小妹克配秦叔氏性幽靜閨閣
賢淑孝專舅姑儀容謹肅室家和平妯娌敦睦惠及里閭
恩推婢僕女誨以工男勸以讀勤慕執筐儉不披縠相彼
良人爾康弗祿宜爾子孫受茲介福

南海廖維烈景讚

卷

三

崑圃公像讚

灼

秉心淵默兄弟同德老而彌篤肫誠懇惻分形同氣奚容
膜隔友于之誼斯為可則覽兩階兮玉樹之森森固遠近
所罕得

佐芳公像讚

景曾

持躬以介接物以和勤儉自勵耿直不阿含飴可樂擊壤
高歌安期稚川壽考同科

蕃昌堂家譜序

翔

吾族廖氏自南宋 始祖凝真公由中州宦遊嶺南卜居
良寶鄉宗支蕃衍科甲蟬聯久爲南海著姓向來有族譜
至道光三十年庚戌族衆公推十八傳秋渠孝廉十九傳
夢生孝廉銓卿明經彙修族譜刊刻世系圖紀家規條例
無不詳備是年秋余始遊泮寓省舌耕未及襄事然旣聯
大宗以詳族姓尤當叙本支以溯淵源本房家譜自雍正
年間十四世 寵德公修訂詳悉迄今數傳支派繁多允
宜續修以示後嗣年來餽口四方有志未逮歲甲寅夏因
時事紛擾杜門家居敬述 寵德公手修舊譜增入後代
備列生終墳墓子女悉遵 寵德公譜例惟我本支歷代

南海廖維烈家譜

卷

三

祖考皆讀書明理積德好善有功鄉族凡我後嗣子孫
當無忘先德爰取族譜善錄所載及少時先伯考 賡堂
公 綺儒公所稱述訓誨者敬謹追叙若伯考伯妣則余
所逮事而及見者也此譜只載本支溯所自出也不及旁
支以有大宗族譜無庸贅也備載同胞別行次重同氣也
自 善藏公以後一體並載者服親無分彼此也並及現
代年庚者子孫衆多俾易省記也以後隨時增及子孫千
億於萬斯年相傳於勿替云

咸豐四年歲次甲寅初秋十八傳孫翔謹識

蕃昌堂家譜序

鑑

我本房向有家譜

十四世寵德公重修其序文真切懇摯刻入族譜知惟孝友于雖本於天性亦出自家傳也後之人編覽遺文孝友之心不覺油然而生矣憶幼時嘗見其筆迹而今徧檢蕩然無存愈覺重修之不能自己然有家譜而無均胙丁簿何也蓋先人誼篤孝友每清冬祭掃及七月燒衣不拘祭肉多少集老少一醉叙天倫之樂已耳迺孫支蕃衍或筮仕他鄉或服賈他邑出外遠涉無非爲光前裕後計念出同源不能與列叙福者仍與以胙肉用致深情爰修前譜並立丁簿立家規以示子弟明 國法以訓子孫敬老尊

南海康維烈家譜

卷

罕

賢視大宗而略爲通變是固然矣更有如 踵弦公及

衷和公之子若孫前序已有遺訓務要一體祭掃後人須

善繼 先志 悅常公後至十四世叔祖均同 寵德公

至親亦無庸分彼此山雖不能盡知其處而祠中神位亦宜並列使先人得展友于之誼雖死之後猶生之時餘外不得援以爲例日後置有附祀祠其卑輩祭掃雖同而坐位不可無別將以明有尊也用仿前例并繪世系圖俾易觀覽將見孫支蕃衍世澤綿長矣另於譜後註丁名壽號及進身榮銜以得按名與胙

光緒十四年歲次戊子清明十九傳孫鑑謹序

晚香吟館詩草跋一

廷相

右晚香吟館詩草族祖鹿齊公所作也吾家自昔多詩人而嘉道間爲尤盛若鑑湖公之紅棉江館詩草羽臬公之遜菴詩草定魁公之遇潛詩草月湖公之柳湖詩草游蜀草秋渠公之信未書屋稿其最著者諸公皆與公伯仲行更唱迭和怡怡如也公少貧力學於羽臬秋渠二公爲尤契交相切以道義長更中外性又好游凡夫世味之甘苦人事之蕃變山川之名勝風俗之盛衰皆身所閱歷故其爲詩情真而語摯趣幽而旨深論事而不涉於迂談理而不淪於晦其溫厚和平之氣溢於言表讀之如坐春風中蓋源出於蘇而弗囿於蘇者也公以郎官出守厯夔州汝甯分巡南汝光道皆有惠政邦人士至今稱道弗衰其不朽正自有在然卽詩而論亦足以傳矣文孫容卿將赴京兆謀以此卷付梓因爲述其梗概抑余聞諸族老公吟草最富間閱紅棉遜菴諸草多與公同作而此卷缺如所載多通籍後詩豈其少作不自收拾歟然如家乘選錄此卷亦多不載則其散失尙可網羅也容卿試博求之

晚香吟館詩草跋二

廷相

鹿儕公晚香吟館詩草廷相昔爲之跋尾越數年容卿自山左歸復搜得詩若干首并文若干篇重屬爲序文雖不多或述身世或紀人事皆有關於風化非苟作者容卿又哀輯諸名流題序及碑銘傳別爲一卷公之美善已詳故言之無待贊述惟容卿勤勤蒐采之意則大可嘉也夫文者言之華也德則行之實也容卿於其華者一字一句猶珍之重之不敢使或失墜矧於其實之可則可法者乎昔司馬溫公嘗集先世遺文爲一牘謂比之畫像尤深切夫所謂深切者豈徒以其手澤哉亦謂因文考行尙有典型爾公少貧力學敦行通籍後爲朝官則練達政事爲外官則崇飭吏治老而致仕爲鄉國士大夫矜式其流風餘韻具見於詩文中容卿循而誦之習而傳之志公之志行公之行則清芬世德日引月長正不徒以文體翩翩遂謂無忝爾祖也

曉巢吟草跋

廷相

吾家工詩者代不乏人惟名位不昌故多湮沒夢生叔祖承其先人鑑湖公之家學篤好吟咏加以抱負才猷感懷身世恆於詩發洩之故蒼涼激壯而於詠古論事尤長公之父行若羽皋鹿濟二公皆以經世自命其詩亦倜儻不羣二公雖非大顯於世然一宰定襄循聲卓著一守汝甯遺愛在民至今人猶稱之以公之才曾不獲如二公之小試八上公車僅就教職又抑鬱成疾未克任事以歿重可慨也甲寅之役公首倡團練設清海局用麻陽三板船攻賊後卒以此獲捷使公得大遇其措施必有過人者然使出而用世則其於詩未必其深造如此矣歐陽永叔有言

南海廖維烈家譜

卷

三

世謂詩能窮人非詩之窮窮則工也其信然耶

題依園圖

廷相

族祖羽皋鹿濟二公伯仲行也服屬雖疏而情均骨肉少
同學以名節相砥礪家貧屢空晏如也文譽赫奕傾動一
時嘉慶道光間先後捷鄉闈成進士伯公以知縣出宰山
西定襄有惠政民戴之如父母中道而歿入祀定襄名宦
祠仲公觀政工部出守四川夔州河南汝寧觀察南汝光
道循聲卓著所至皆有去思退老林泉鄉國矜式二公行
誼均載府縣志傳廷相生晚不及從二公之後顧歲時休
暇歸遊族里聞諸父老稱述清德輒動高山景行之思當
承平時吾族富厚耕讀相安園林之勝左右相望二公倘
徉其間論文賦詩子弟奉教維謹至足樂也今則世俗已
非求所謂訊芳涵香寄園東園之勝蕩然無有惟依園獨
存雖花竹水石猶有手澤之遺而風流不可復覩矣仲公
文孫斌卿出示此圖瞻仰之餘恍然當日行樂景象抑聞
二公吟草甚富斌卿盍取倡和諸作附錄圖後不尤見家
門之韻事歟

書釋詩釋跋

李光廷

右書釋一卷詩釋二卷南海廖翹撰翹字羽皋事履已詳
篇首此編爲羽皋教讀時作胸有卷軸皆足以達其所見
如書釋之導泝以下十三章人皆知爲導山此獨指爲導
水又詩釋出車六月諸詩論宣王平戎事按切時地顛撲
不磨其餘亦就衆說以折其中雖朱蔡亦未盡信也至於
今文古文亦取其詞之可傳不如閩百詩等之書概行抹
殺若葛生蒙楚之詩直指爲婦人之悼亡雖古人未必有
是事而引據周詳足圓其說是真讀書人非徒佔畢矣是
篇久未刊惟李葆初學博有其稿亟登之以爲稽古之助
云

賀豐鄉璜岸社重修記

廷相

萬物非土不生土地廣博不可徧敬於是封土而爲社所以神地之道也其制有壇有樹所以依神也祭以戊日從其類也自太社至於里社莫不有所祈焉莫不有報焉吾鄉璜岸社爲廖梁陸三姓人所共立各族人環社而居何時朔始不可考矣重修於嘉慶戊申迄今幾及百年其場壝頗有坍塌者三姓人醵貲重修頽者培之裂者甃之加植木焉凡費工若干用錢若干崇基鞏固嘉樹蔚然鄉人飲酒落成禮也古者百家以上則立社介黍稷穀士女詩人皆於社期之然時和年豐而逸居無教則有入於奇衺者矣周禮州長歲時祭祀州社則屬民讀法以攷其德行道

南海廖維則家譜

卷

巽

藝而糾其過惡黨之祭酺族之祭祭亦如之今雖制不古若然鄉之搢紳父老亦古州長黨正族師之類也儻能本古人之意爲之勸戒生其善心而消其戾氣庶風俗日臻上理乎夫民和而後神降之福惟吾鄉人篤枌榆之誼出入相友守望相助無猜嫌無怨惡神之憑依將在於是則吹豳飲蜡豈徒酒食徵逐云哉里人廖廷相記凡出錢者例得備書

重修賀豐鄉二帥廟碑記

廷相

五行相沴之咎惟神能弭之百物阜安之休惟神能迓之故古者建國必立主祀如商邱主辰大夏主參是也下而一都一邑莫不皆然凡以爲民祈報也吾鄉之西有古廟焉前堂供

梁康二帥後堂供

文武列聖四姓所奉香火也中立社稷壇相傳爲一甲所祀廟遙臨大河河內長隄如案河外列紫洞諸峯如拜如伏西爲賀豐書院文人之所燕集也東爲觀音堂婦孺之所拜識也左右拱護如鳥舒翼形勝所在神式憑之故祈禱輒應廟前七村基東圍之最衝要處每遇潦漲險工疊

南海慶維則崇譜

卷

七

出鄉人迎神像至隄上卽化危爲安全圍田園廬墓翳惟神是賴所謂禦災捍患有功烈於民者非歟廟址形家謂象嶼形故不能蝨石門外餘地數百步陂塘映帶巨榕交蔭每當炎曦麗空濃陰市地鄉人小憩其間話桑麻談故事閭里小嫌微言輒解不啻神臨之在上質之在旁焉廟建於康熙辛未重修於道光辛巳迄今又七十餘年壁宇將圯鄉人醵金新之經始於 年 月告成於 年 月糜白金若干而堅緻牢實煥然一新然神聰明正直者也既有以妥神棲尤貴有以悅神志惟吾鄉人勤耕稼敦雍睦庶幾神顧而樂之而時和年豐降福孔夷將於是乎卜之矣

光緒壬寅重修祖祠記

昇 照

大宗祠之建立也始創自十二世廻涵公重修於十七世
擎儔公歷年既久漸就剝蝕迨至光緒二十七年寢室上
蓋暗被蠹朽遂爾傾塌隨察中座楹柱亦爲蟻蛀不修將
傾於是集族衆以籌款召工匠以興修閱數月至壬寅夏
始克告竣規模仍舊氣象維新祠左更闢新廳廳左復闢
小花園前爲大廚房後作閒廳所局面開張觀瞻益壯僉
曰祖祠重修落成旣妥先靈宜伸慶祝遂合族演劇而稱
觴焉所費已用去萬餘金回憶擎儔公重修時見寢室後
襯尙虛添置後樓一所左輔以文昌閣右翼以財神閣堂
皇鞏峙屏帳巍然其後癸酉科士瓊公獲鄉薦丙子科鹿
儕公鄉薦聯捷繼而已卯科羽皋公領解數年之間科名
鵲起安知今日之修建不如前日之更盛乎是宜勤耕勤
讀訓子弟以詩書必敬必恭和鄉鄰以仁讓則人才蔚起
鄉運日隆太祖在天之靈當默佑之

擬建武威堂及捐款購置義地記

昇 照

惻隱之心人皆有之故凡同類者莫不相親愛各盡其道此武威堂之建與捐款購義地之所由來也人之生死有定至貧乏以終其身或有欲葬無所能勿惻然爰集八坊題倡義舉以爲購置義地之用光緒元年憑中人韋光與陳敦仁堂買受大北門外大象岡山地一段光緒十八年憑中人李由與三元里人李秋買大北門外龍蛇地谷子秧地田一段此段卑濕衆謂無用光緒二十五年憑中人葉氏與梁金大姑買受小北門外土名金釵嶺竹園地一段當事者已不勝經營奔走之勞然安葬得所拜掃無資亦等委諸草莽各值理已見及此遂賣舊省館復勸義助

南海履維烈彙譜

卷

巽

購得西門外東勝里屋三間名曰武威堂省館其中一間留爲出入休息之所餘兩間出租與人租之所入充作定期每年穀雨後三日拜掃義地及與祭者叙福之用八坊中公推管箱值事八人不設掛借不得侵挪明定章程俾共遵守庶幾垂諸久遠受福無疆矣謹將建立省館義塚芳名列後

竹生

源高

世祺

尙瓚

已上建立省館者

祥芳

沃芳

明欣

耀華

和輝

已上建立義塚者

擬重刻書繹詩繹議

景曾

羽臬公著書繹一卷詩繹二卷發揮大義微言獨有心得於興衰治亂之原尤三致意焉原稿存南海李君彪元處光緒戊寅番禺李君光廷刻入榕園叢書中宣統庚戌南海續修縣志未列此書誠憾事也聞榕園叢書爲肇慶某太守捐貲所刻太守解組將版片攜去滄桑屢易恐已無存異日嘗款稍裕當重刻之使吾族子孫有所矜式清芬可誦祖德無忘明達君子必不以斯言爲河漢也

詩選

廷相

字澤羣著有北郭草堂集

題李陶村寸心堂詩草

嶺南自昔多詩人國初首數屈梁陳張黃黎呂繼後塵珠
海老漁獨清新弟子儒雅皆彬彬就中李叟尤絕羣伯倡
仲和齊篋墳沈酣邱索與典墳揮毫落紙如煙雲少年橐
筆走從軍是時吳會方妖氛羽書旁午揮灑頻間爲詩歌
寫見聞風雅正變成等倫時平歸卧粵海濱當道交辟束
帛紛評今隲古還校文驪黃牝牡賞識真爨桐車鐸拔擢
神有才如此宜王賓胡爲一第偏艱屯多文爲富原非貧
况復春秋如大椿鄭虔有道殊可親貽我詩卷珍琳盥
南海廖維則堂家譜

卷

五

手薇露讀百巡三日猶覺荀香薰知君青蓮之後身

題黃小宋歸粵草

書生解甲稱循吏花落琴堂方待理忽思命僕促行裝駕
言歸飲珠江水時人謂君夙好遊峩眉高華經窮搜故鄉
山水傳來久此行定爲登羅浮君聞其語心惻惻中有至
誠人未測摧殘馬鬣無人修畏此簡書歸不得方今烽火
息屏藩陳情暫許歸田園正須封樹崇窀穸莫使榛蕪莽
墓門歸懷已剖歸心促纔拂征塵興板築欲冀先人早奠
安躬親負土成功速功成事了此身閒馳心忽又到名山
不從風雨看離合恐負長途此一還竭來粵山登八九又
得新詩若干首一時酬和盡名流愧我菲材如敝帚聞君

回豫歷蘇松虎阜獅林在眼中他時定有游吳草全集添
編四百峯

題羣仙祝壽圖爲吳星樓部郎尊人雙壽

吳君手一卷索我以言詮云是畫師南羽筆瑤池祝嘏來
羣仙披圖古色溢絹素五光十色相新鮮金銀臺閣生縹
緲下爲福地上洞天玉帝宴坐乃王母霞裾月帔雲髻鬢
侍者捧執左右立飛瓊弄玉皆嬋娟紫蘭宮女傳使命奔
走颯沓昆侖前老子騎青牛飄忽行雲巔琴高跨赤鯉浩
蕩隨波淀吹笙控鶴王子晉攜籃采藥唐偓佺蘇生乘龍
昇冉冉處靜駕鹿驂翩翩或浮貫月查或泛太乙蓮雲譎
波詭莫名狀風行水息何踟躕紫翠丹房瓊華室十洲得

南海廣雅則堂叢譜

卷

五

道咸來連異草奇花紛點綴得餐一莖亦忘年其間雙松
更奇特交柯連理盤蒼煙暖吟虎嘯恍可聽繪聲繪影神
復全西方世界洵極樂一歲一度開華筵閩風元圃本幻
境得意自可忘蹠筌香山老人心太古三見滄海爲桑田
金齒鐵牙宜壽考老萊偕隱成比肩鳳毛殊有應列宿况
復蘭桂方爭妍幾生脩得乃如此喬松能不爲垂涎斑衣
繞膝奉卮酒定有玉公金母相周旋我語吳君當粲然此
卷請爲而翁傳

題梁檀甫方伯喬梓京兆圖

番禺之麓江水清扶輿磅礴鍾秀靈梁宗崛起傳黃埔一
門濟濟羅簪纓靈椿丹桂競翹楚植根翰苑同蜚聲軺車

繼出採巖幹歸來作尹威神京赫赫熙熙濟厥美長安桴
鼓常稀鳴高風清德遠相望岱雲晉水何足稱憶昔孟堅
紀漢績三王趙張誇能名前輝後光非一族何如家範脩
門庭我來輦轂訪嘉樹喜見繪畫形丹青報最早擢藩條
去會看開府隆隆升

元日作家書

夜寒砭骨衾如鐵北風吹下漫天雪朝來雪霽風亦晴瞳
瞳日影窺窗明韶光已換年華去梅花迎得陽春住聊折
一枝寄嶺南焚香靜寫平安字我生本懶著朝衣毛義捧
檄休相非庭前寸草發生意但願長戀三春暉吾家孟光
能解趣此時應把心香炷椒銘柏頌祝高堂蠟燕絲雞娛
南海虞維則堂篆譜卷

五

婦孺閨中若問近何如長安官舍等閒居獨飲屠蘇歌郢
曲古歡永夕結圖書

長歌行

語云文以窮而工爾旣欲工胡辭窮又云文章憎命達爾
胡窮年白兀兀高車駟馬爛聲施庸庸耳目交嗟咨過眼
雲煙會有盡顯者如林傳者誰古人著述心良苦不爭一
刻爭千古投閒置散本玉成征夫駢駢獨閉戶酌我酒一
壺發我書五車經術窺鄭許詞賦誦京都知人論世覽文
史辨方識險披輿圖丹黃錯雜自怡悅乘興偶作狂歌呼
牛毛麟角貴自勵緘石覆瓿吾何須金盡裘敝且勿恤倦
眼詡詡醒蘧蘧

戊寅除夕遣懷

京館夜坐聞爆竹聲達旦因感歲華之改且憶庭闈之隔走筆成五律四首

今夕云何夕宵聲爆似雷一年隨臘去萬里盼書來倍切思親意空慙出世才瞳瞳燈影下掩卷獨徘徊

底事音書滯洪喬豈誤投離家纔兩月積恨似三秋節近情多感身閒室更幽一官有何補祿養未能謀

去歲逢今夜團圍共禱祠分柑兄弟樂索肉女兒癡雁忽

翔江樹

五兄先余客漢口

烏難戀嶺枝南天望楚粵何以慰相思

我欲將詩祭還慙酒脯微勝人惟有暇閱世本忘機卜鏡憐閨閣題符徧戶扉撥殘商陸火寒氣漸侵衣

南海廖維則家譜

卷

五

夏夜偶成

風雨瀟瀟夜鐙寒覺漏遲已過芒種節猶似暮春時眼倦頻拋卷心閒欲試碁柴門無剝啄養拙稱吾私

歲除大雪道中口占

寒雲陰翳朔風饕老鶴無聲鶴不噪仙女散花飛輦路天公戲玉落城壕道逢沽酒人拖屐戶滿題符客吮毫我愧袁安高卧節殘年車馬尙勞勞

葡門煙樹鬱森森銀海光浮粉堞沈關外多寒宜挾續曲中寡和莫題襟長裘空抱香山願廣廈難酬子美心且喜豐年三白兆輪蹄逐處聳肩吟

冬日旅館雜詠

寒竹吟風

此君骨節本天成清夜風來韻自鳴祇許七賢同灑落不
隨萬籟競枯榮欹枝側葉皆宜畫戛玉鳴金總有情倩爾
歲寒聊作伴時從窗外和書聲

空庭浸月

紙窗竹屋小如舟地淨無塵月欲浮前度珠江閒泛棹誰
家玉笛最名謳半林枯竹虛濤響一曲涼琴記水流領畧
清寒好風景此身疑在碧雲頭

喬木棲鴉

作巢高處貴經營百尺杈枒夢不驚夜靜月明三五點曉
寒風促萬千聲煙毛莫訝遷幽谷日影長教傍

南海廖維則家譜

卷

五

禁城啞啞頻啼渾莫厭有人於爾卜題名昔人相傳春闈
之歲即館樹鵲

深巷吠犬

寒更橐橐鼓鏜鏜地僻人間夜倍長擗落有聲驚欲起雪
飛無影啖偏狂朋儕偶至愁林黑族夢頻驚到月黃笑我
詩囊蕭索甚空勞守護竟宵忙

假山疊雪

積石為山傍碧欄天花亂墜雪初殘不勞杖策支硎去自
有層巒僻砌看幽欲生雲憐洞暗棱如削玉覺峯寒玲瓏
凹凸皆爭趣尺咫何殊十八盤

古井澄泉

一泓清澈浸晴空挹注源源養不窮午夜烹茶堪供客芳
辰灌竹每呼僮潛蹤未許蛙鳴聒品味遙知虎跑同機事
機心渾不解日來抱甕羨鄰翁

題潘學士西園涉趣圖

境界無仙凡人心判囂寂不爲事物羈襟遠地自僻矯矯
河陽公聲價動鸞掖持節來澗邦風教特整飭餘事及游
宴開徑望三益衙齋有小圃荒曠侵榛棘起廢本素志况
乃前賢迹一朝興畚揭堂榭廓然闢栽培在林木點綴雜
泉石使車多清暇徜徉永朝夕酌酒敞新軒撫琴布文席
亭香定不減徑緣寒如滴影韻悟橋廊詩記鐫屋壁登臨
亦有限情興自無極異哉軒冕場獲此寬閑域是知宇宙
間隨分皆可適何必遁隴畝胼胝效沮溺悠悠柴桑車落
落東山屐出處縱復異懷抱豈云逆披圖再三歎超然見
胸臆

題潘學士緝雅堂校詩圖

儀徵去後頌聲寂百載迢迢見此圖自是東南壇坫不
教滄海有遺珠

顯德由來重采詩輶車兩度息陬時雅材大小歸珊網珍
重丹黃下筆遲

佚事叢殘比碎金徵文攷獻徧詞林平生風義知何在試

向毛公小序尋

公輶軒續錄自序云
六月詩序致爲警心

精鑿素推蘇玉局寫生難得李龍眠陳髯亦有填詞製爭

似瓊瑤溢萬篇

題黎忠愍公黃牡丹詩畫真蹟手卷

光緒丙申十月余課院生文學題爲和黎忠愍黃牡丹詩子展太守見之因以所藏忠愍真蹟索題并述菊坡精舍舊事擬選錄佳句重誌墨緣意良雅也開卷則東塾師之遺墨與舍弟之摘句在焉時杖履久歸道山而予季之墓亦已宿草追念疇昔不禁黯然

驚才絕艷稱花王曠代猶傳翰墨香漫說虞山非巨眼英魂毅魄冠詞場

立雪程門韻事傳披圖還見舊題箋平生不盡鴿原感彈

南溟廣雅則叢譜

卷

五七

指光陰廿四年

題背立美人便面

絕色原難見丹青畫不成且將毫髮露幻想賦閑情

廷福 字錫茲著有紅蕊山房詩稿

題黎美周黃牡丹詩畫卷

揚州十里春無主蓮鬢更比蓮心苦毅魄騷魂不可招斷
粉零縑足千古金罍酌罷興淋漓想像生平得意時繁華
白榻姚黃稿穠豔兼題李白詞香心一旦成枯槁馬革裹
尸臣事了幸分心血作詩人不教盡染虔州草摘豔薰香
繼起難影園空賸舊吟壇願將粉本流傳徧當作簪花一
路看

羅浮蝶歌

麻姑衣裳好顏色薰香久坐梅花國蛻去遺衣不自收化
爲仙蝶雲峯側舊志胡蝶洞在雲峯巖下丁香點眼榆莢錢仙羣彩縷

南海廖維則堂篆譜

卷

癸

垂翩翩瑤草瑤蕩任採採金碧炫耀朱明天春駒冉冉靈
成匹我欲騎之觀日出滄海茫茫夜未央九天霞影涼侵
骨粉翅香鬚小玉腰我欲隨之過鍊橋仙雲縹緲一水隔
神情栩栩難相招自來未慣紅塵宿但戀名山作湯沐應
伴收香綠鳳皇還同不老銀蝙蝠昨日遊人下翠微拾得
仙園獨繭歸朝來挂壁無蹤跡知在梅花村裏飛

綠陰

不藉階前翦篋篷天然空翠隔瞳矓拓來餘地三弓暗表
出餘花數朵紅藤簟望中宜位置藥欄低處見玲瓏尙嫌
逗漏炎光入添種當簷竹數叢

塵尾

王謝家中物相須別有因禪僧勤拂拭名士有丰神日午
增談柄風前擺俗塵莫將紅拂妓來例白衣人

翦笠

編篋圓如蓋東蓄聚曉春梅風防透頂穀雨免濡身晝裏
認漁父車前逢故人不同紗帽影慎勿厭清貧

踏青曲

三月三日春風嬌桃花想面柳想腰芳草芊芊滿平渡一
路拖痕上玉橋玉橋西畔紅樓出樓上盈盈破瓜日倡條
冶葉浪繁華吹香那及如蘭質露華厭浥煙冥冥寒食風
寒逼夢醒忽聞樓下油車過知是誰家早踏青踏青約伴
披星曉也向郊原拾芳草杜鵑啼損馬塍花墓門何處尋

南唐羅則堂譜

卷

五九

蘇小鳳鞋窄窄鴛裙低香風吹面桃鬟齊柳絲惹恨金堤
北花萼迎人紅陌西紅陌正多驄馬走回繮忽指金堤口
綠意紅情究若何不解遺鞭屢回首鶯柔蜨媚弄春暉花
露在鬟香在衣終朝采綠今盈掬陌上花開可緩歸

秋雨

三徑荒涼傍晚時天容漠漠雨絲絲淚拋紅豆西風急雲
壓黃花瘦影垂巫峽有神愁日暮巴山無信定秋期撩人
不止淋鈴曲落葉哀蟬助遠思

似翻銀漢洗清愁幾日閒階聽未休楓葉有時疑夕照桂
花無影度中秋天驚石破笙篔引被冷燈殘燕子樓已覺
金微幽夢苦那堪長夜續更籌

簾捲輕寒思悄然紅樓相望隔深煙新詞合譜瀟湘夜幻
夢同參秋水篇斗帳祇堪容我坐酒杯無那勸人眠西窗
欲翦懷人燭遠雁聲沈信未傳

連江煙景漲濛濛淺水蘆花罨畫中積淖久荒沽酒路跳
珠頻打釣船篷寒螿斷雁聲俱急蕉葉秋雲夢已空惆悵
天涯游子意萬端根觸一時同

鼙鼓聲沈無定河陰山雲起作滂沱泥沾白草人收牧潦
積黃沙豕涉波鐵馬長戈邊路滑玉門衰柳淚痕多已憐
車下身如蠟更溼征袍可奈何

蒼溜驚濤攪睡情吳松夢斷正三更平添蓼溼三分水留
得荷池半夜聲自喜逋租完九日誤猜時節近清明朝來

南海粵雜則景譜

卷

卒

若證淵滂頌記取葡萄倒一棚

柳影

匝地陰圍萬綠叢金堤西畔玉樓東縱添風線難穿燕但
上人衣不繫驄樊素歸魂明月下小青心事夕陽中春圖
一幅誰描出疎雨微烟洗碧空

苔痕

輭翠平鋪雨後滋石涼花膩嫩晴時誰將漏室銘中景擬
作神清洞裏詩蝸篆碧紋沿壁穩蝶隨芳色上階遲何人
訪我拖芒屨不解藏蹤步步知

七月十五曉晴縱筆

向曉雨忽霽暑退心頗洽拓開樓上窗小覽白石集坐看

修篁枝猶含宿潤溼蕭風一翬來搖灑入几榻
昨日不停扇尙嫌細葛重夜來藤簟上布衾亦可擁素秋
雖未成商意躍欲動好催受田夫薿薿布晚種

春日偶成

和風拂作花鞦扇細雨陰成酒色天

燕俗以陰雨爲酒色天見帝城景物畧

昨夜海棠紅徧了石屏山外繡簾邊

雨中過紅棉寺

枕椰扶人不肯住躑躅苔花繞山路滿天涼雨下江城迎
頭但見珊瑚樹樹頭火雲紅欲然鶉啼未破空山烟擁簑
暫倚山門立鐘聲在樹晨光溼

春日飲酒

南海羅則堂詩譜

卷

空

不向春前飲花枝應笑人由來一杯酒消得百憂身蝶舞
翩翻媚鶯歌節拍新莫將好韶景讓與別家鄰

夏日齋居分詠得品茶

齋居無計解朝醒竹裏聊傾有耳鎗巖種不嫌煎味苦石
泉猶喜汰詩清盧仝陸羽成知己汲黯寬饒見性情自把
磁甌親切看一層雲散一層生

丹桂

何年沙汞化丹邱幻使繁華染素秋句漏漫勞方士覓小

山曾爲故人留金魚暗鎖朱門隔

玉溪生燕臺詩金魚鎖斷紅桂春

玉蠹

香懸畫檻幽好植雲梯攀月窟一枝榮作錦衣遊

黃槐

綺陌銅階夾道長御袍交映見輝光金符夢剖原無郡玉
陛朝歸尚有堂古渡日昏蟬蛻老棘圍秋暖馬蹄忙寄人
亦有籬邊菊爭似垂陰十里涼

景星 字明生

西樵山杜鵑花

翠微深處幾人家萬壑千巖鬪物華山石榴開紅夾路丹
光晴貫洞中霞空遺蜀帝千年恨吐作春風百種花樵子
晚穿雲外去柳塘烟起日西斜

集古

三月三日鑑湖修禊

七律并序

昔蘭亭一會千古健羨而逸少若有無窮之感何
也考永和九年卽晉穆帝之九年其時殷浩當國
欲與桓溫抗不度德不量力復以經畧中原爲己
任雖山桑之敗尙在是年之冬而去年戰於戒橋
晉師敗績識者無不寒心此逸少貽書責其力爭

南海廖維則堂蒙譜

卷

三

武功天下將有崩裂之勢也當文酒讌集能不因
時卽事以寄其感喟哉撫今追昔何獨不然掇拾
成章無當大雅亦聊以寫其懷抱云爾

三月三日天氣新溪泉清可濯纓塵探花直往尋詩客看
竹何須問主人嵐翠暗來空覺潤白雲何事獨相親階臨
池面勝看鏡欲膾湖中赤玉鱗

集古

初秋旣望玩月

早起看秋月分陰惜莫忘清輝雖漸減無限好餘光

以南

十九世景龍叔隨兄客游南洋兄亡後隻身萬里落魄三十餘年今年春負骸返里家人歡迎將骸骨舁置家中其友愛如此予雅重之漫成二律竊自附於顯微闡幽之意

同向天南去中途斷雁行一坏埋旅櫬雙淚落胡疆麥飯
清明節旃廬日暮香殷勤三十載江水弟情長
白首他鄉客天涯鳥倦飛不辭筋力憊竟負髑髏歸有主
兄尤感無家弟可依江村傳盛事迎骨敞雙扉

事紀

吾鄉自 始祖卜居以來歷世數十歷年數百海濱僻陋本無足紀第其中古蹟傳聞時事軼異與夫建置興廢典故由來地雖褊小不一而足老翁曝背喜談往事此亦里巷所不可偏廢者因畧爲事紀或亦徵信將來

觀光樓建於嘉慶初年當時地師馮孝廉冠玉來審方位謂 始祖祠宜于下關未坤方置文閣因砌築海坦釀土爲基鼎建此樓植樹環護不十年榕陰廣畝與舊種紅棉間出江天遂爲村人晨夕遊憩之所因有古墟榕陰之目燕祉堂蓋因十三世炎蒼公百歲坊而建也百歲坊後爲

南海廖維則家譜

卷三

事紀

五

始祖稅地因闢斯堂以爲父老春酒讌會之所後之子孫引年尙齒奕世不忘時或葺而新之不知凡幾但未增其舊制耳

禁刀社在村南神仙掌西隅長橋臥波古榕蔽日可濯可釣亦村中消夏佳處也此社爲昆重房子孫與梁姓同立相傳地係昆重祖讓出今社前水步仍昆重房稅業也社前大石一方用作神案光潔可鑑村人輒用作礪父老惡之鐫禁磨刀三字其上因以得名月湖有詩云一自買牛曾賣劍至今邨社禁磨刀

絃歌里在 始祖山右住居分東西兩向爲村巷之最深長者代有好學能文之士羽臯有詩云不知學道從何日

留得絃歌舊里名

竇蔡巷云是卽今之中道巷當時有竇蔡二姓同居于此本有橫涌自西而東是皆故老傳聞今則園林祠宇均爲各家稅業矣或云古時橫涌居人就漏水淹蓄豆菜因名豆菜巷未可稽考

何蕭塹在往上村橫路之側舊時有何蕭二姓在此居住因得此名今則半成古塚半栽桑柘渺不可考

夏巷卽今巨興里亦相傳爲夏姓居住之地不知年代今盡屬本家房產矣

福壽社在西大基車風角下前時不知何姓居此今只遺此社有石鐫福壽社三字傍有兩石鑿字似係社壇對聯

南海履維則家譜

卷三

事紀

六

泥土埋沒大半尙朦朧可辨但世遠年湮未便搜剔

細圍在北大基外另築一圍稅地百餘畝舊傳此處別有村落有小涌通流今雖片瓦無傳久爲村人耕植之地然高下形勢及頽垣磚礫時露鋤下但未審居人何時大去耳

細村園爲二世祖墳朝案之用方圓數十畝地勢隆起舊傳此處居人衡宇相望因別爲細村之名今則邱壟芳阡墳塋叢雜不知歷幾世數矣

村心 始祖墳前草地十餘丈之外橫以長塘塘外平田田外案沙形家謂橫水橫沙信不謬也舊傳塘外原有小涌環抱今則全變爲田然塘外平田本甚低聚田源北來

南去近因田底日高兼之下砂多淤遂至田水有南北分
流之異蓋從前村居多用土磚村人每冬卽灌此田搏磚
故田泥歲得罄脫今村居全用青磚土磚無處消售田亦
因而高磽姑記之以俟後來作用

神仙掌 二世祖墳田源水本係由左趨右入涌或涌水
及田水滿溢卽由細村園邊荔枝坦往南而去道光壬辰
沙開基被決荔枝坦田畝被白沙積壓水淺不通只有由
涌退出涌口一路耳每田源盛漲卽有右水倒左之異形
家針盤是否仍合此非淺學者所敢議

北沙舊名官洲沙爲 始祖嘗業有官洲橫水渡過河久
經承餉對河寮房并有沙數畝亦 始祖物業此沙西至

南海履維則蒙譜

卷三

事紀

三七

竇頭鄉梁姓渡頭爲界自嘉慶年來沙嘴逆潮生上尖銳
竟數十百丈直出海心論者謂沙角出耀村中當是興旺
風水無憑姑記之以俟徵驗

三界神廟在 始祖祠左關之外屢著靈異浴佛節爲

神誕日鄉人釀金演劇歲以爲常俗傳 神實扞潦患每

遇盛漲搶險輒迎 神像至堤上卽化險爲平或入夜則

鄰村望見遍隄神火屢有徵驗嘉慶丁卯重修 神廟卜

四月奠土演劇適潦漲劇場改期五月復因菊部悞期又
改六月當演劇之日突有巨盜駕扒龍十八隻由三漕口
直駛而至沿河擄掠時未傍午盜船搖旗向岸觀劇人衆
鳴鑼發械賊遂畏不敢逼逕奔上流而去設非演劇則倉

卒間如何措手又道光丙午當廟前演劇稠人中試演礮位忽大礮窄裂鐵幹飛觸巨木爲折鐵片粉墮地板多穿而礮之左右及發礮之人衆皆無恙餘飛四落亦無一人被傷者謂非 神靈異安能如是

我族聯壽之舉年代較遠者已不及知乾隆年間庚申丁酉經兩舉其事嘉慶辛未 大宗祠落成又再舉焉道光丁亥羽臬捷南宮假還又舉焉製錦置屏用垂久遠丙午銓卿中副車慶酌間又經再舉壽者之多每軼前代

丁亥春初聯壽前一日鹿儕自京邸郵寄各壽聯適至內曹麗笙相國聯云邛治久涵濡喜諸老白首聯翩酌兕扶鳩熙皞共躋仁壽域宗支方盛大看闔族斑衣綉綵鳴珂

南海廖維則家譜

卷三

事紀

六

聚笏輝煌同入德星圖蔣礪堂相國聯云合族屬以慶高年鳩杖同遊風淳俗美率子姓而祈壽耆萊衣互映雲爛星輝姚秋農尙書聯云休誇白傳香山尙齒敬宗觀于鄉而知王道之易何異高陽德里恭兄祇父登其堂而生孝悌之心毛茱村閣學聯云杖於鄉杖於國譽隆更叟澧有蘭沅有芷慶洽孫曾郭蘭石內翰聯云鳩杖逍遙共數松喬甲子鳳毛濟美咸推荀薛兒孫張翰山方伯聯云敬族睦宗維則堂中崇壽考引年尙齒洛陽社裏會耆英錢東牛編修聯云執沖含和宜受天稷迎祥迂祐共保春祺其附近戚友各聯多出新意如謝澧浦太史聯云丹井本延年一門星聚玉醪齊介社百榼春濃餘未備錄

始祖祠內楹聯前後撰述不一前時寢室聯爲十二世憬
蕭公撰書八分體古味盎然惜日久朽爛今所懸聯爲鹿
儕撰句云述祖訓無多願子孫勤耕勤讀處家庭有道事
父兄惟孝惟恭又聯云家由南宋而來五百載祖德宗功
遠貽堂構地挹西樵之勝七十峯朝華夕秀代啓人文爲
鑑湖撰句秋葉屬對二聯俱香山鮑逸卿書中堂所懸聯
及維則堂額俱湯敦甫相國書聯云惟孝友乃可保家兄
弟休戚相關卽外侮何由而入舍詩書無以傳後子孫見
聞不雜雖中材未至爲非書法逼真古人味之如對鼎彝
莫名其寶

庚寅春鹿儕請假南還省親上壽戚友製屏稱祝者甚多

南海廖維則家譜

卷三

專紀

三九

內張翰山方伯卒一樵比部兩家書法尤極高古鹿儕自
撰聯云北闕湛深恩十二年鸞詔頻頒曲成臣孝南陔脩
潔養七千里烏私反哺未報親劬語殊親切有味邇來慶
酌各聯多有可觀癸酉中式云分來仙桂一枝月窟初探
從此植根有種破去龍門三級雲程得路佇看燒尾齊登
丙子中式云誰云天馬長羈萬里橫行知己會須逢伯樂
自幸祖鞭先着三更起舞聞雞還欲待劉琨丁丑進士分
發工部云壯志粗酬想十載科名尙覺驚心看韞璽前程
尤重念他年事業還須努力效馳驅饌出大官廚烹雪調
梅盛事特邀綾餅餽俸領司空籍燕賓速舅君恩新賜水
衡錢已卯解元云若論科名此事三載有人敢向南中誇

第一相期遠大自具千秋絕業真慙國士譽無雙俯臨七十峯孕秀毓英袖底雲烟歸拱揖怒擊三千里徒溟運海眼前風日好扶搖戲場云在我後來原不少出人頭地本無多丙戌進士適闔族聯壽云會啓香山白首欣看後起縣分勾漏丹砂快奉高年戲臺聯云窮達何常看臺上忠奸可泣可歌斯卽當前金鑑是非難昧聽此時父老閒談閒論應知他日輿情辛卯中式第四名云秋露薦苹香欣逢卯值歲星再三屈指名相應仙風登桂籍正喜丁爲典校高下承恩位恰當是科爲丁伊輔先生主試也青雲路不少過來人指引階梯千尋直上連三級丹桂花許多留後種栽培根幹四照祥開占一枝諸聯頗能貼切錄之以

南海慶維則堂叢譜

卷三

事紀

辛

資一家談柄

節孝坊在百歲坊南爲燕藩妻陳氏建

我鄉素無盜警而守備常嚴賊望風生畏嘉慶己巳海寇張保仔駛進內河所至焚掠村堡居人遠遯我鄉訓飭子弟脩守戰之具各要路植立木柵稽察行人以防窺伺賊艘蟻聚攻瀾石村瀾石失利賊將長驅大進先遣小船駛至吉利石碇探知有備遂退闔境以安道光辛丑英夷犯順盜賊蠡起我鄉申明禁令飭丁壯繕器械懸重賞懲勾引一時境內肅清遠方居民多避而至甲辰水患後賊風愈熾而亦獲保無虞有備故也

前人整飭族務極詳復請

示遵行意至深遠康熙四年

五月初一日廖天錫等呈爲乞 恩賜印俾協輿情恪遵
眾例以崇祀典以正族屬事又廖彌國等呈爲乞賜全
恩以正族屬以垂永久事內云遵古例一十二條酌當行
二十九款以懲以勸惟敬惟誠云云又乾隆三十三年三
月十三日廖清彥等呈爲懇 恩印給例部以維風俗以
敦雍睦事業經 恩准給印發示遵行在案各條款悉另
簿錄存以垂久遠迄今時事沿變取舊日規條畧加增改
刊刻遵行凡我族眾各宜仰體前人訓誡無已之心勸善
規過惕惕兢兢庶幾人心淳而風俗益厚已

經營創置固貴有開必先尤賴繼起者隨事維持業乃不
至中隳我 二世祖嘗項素非充裕嘉慶初年族眾倡集

南海廖維則家譜

卷三

事紀

七

八桂會項典受順德大良陳察采名下土名第三埒水田
壹頃叁拾柒畝零開載香山屯稅典價銀貳千玖佰餘兩
是時遞年佃租銀叁百餘兩迨己巳庚午間陳察采與其
媳黃氏爭產構訟圖吞典價瞞稟 府憲批占不休庚辰
秋熟黃氏率眾搶割我族卽稟順德縣飭令巡船將搶割
人贓並獲轉解香山縣審辦領回穀石至道光初年再斷
賣契找價銀陸百兩以後此田方得永遠管業豎立良寶
維則堂石界今批與小欖梁儀章圈築遂成圍田我族子
孫當隨時照管勿以遼遠而漫不加意也

本族自嘉慶年間始立太和會以裕嘗項其例每會份四
十人或聯一會或聯兩三會人數至百餘份至道光年間

垂五十年凡標投者無不按期清繳從無絲毫延緩
水患冲決河堤雍正乾隆以前莫可稽考乾隆甲辰决龍
畔猛火隄嘉慶丁丑亦决猛火隄道光癸巳决羅村竇下
甲辰决沙闌村前

我鄉與沙田鄉向互爭隄界甲辰培脩兩鄉始公分定
豎立石界賤明白界石東屬沙田界石西屬良寶按界培
築兩鄉共立合同永遠存據

良寶鄉基份共屬四百九十二丈四尺南與沙闌分界豎
石爲界另於梁宅與賢里後園角貼基處立石一段箋云
南白沙闌分界石起至此園角牆邊止共長壹百零三丈
六尺由牆角往北至沙田分界石止共長三百八十八丈

南海慶羅則黨家譜

卷三

事紀

三

八尺合共基四百九十二丈四尺未與沙田分界另於水
闌東邊立石一段賤云東白沙田分界石起至此水闌東
邊石止共長七十九丈由此石續量至南與沙闌分界石
止共長四百一十三丈四尺合共基四百九十二丈四尺
道光二十四年脩基各處立石誠恐日久或有傾仆偶得
一段足資考據也

甲辰水患較前加大二尺有奇向之加高培築者至是乃
漫而過之各鄉益支持竭蹶沙闌之决也潦水自西北來
至紫洞旋折而南沙闌適當其衝且大柵圍先决水自圍
內溢出高二尺許若灘流倒下吉水竇旁亦决從官山河
出厚集其勢以沙闌當之其不决者僅矣五月十六辰刻

基面覺有裂痕鳴金集衆救護至已刻基面劈分兩片內邊漸墮數尺外邊障水一塊僅厚尺許形如壁立衆搶救益力至午未分漸次集事忽有自外來者訛言吉利海口何家基已決衆急散歸救護老小後探知其妄號召未集而隄決時五月十七晨也

粵東水患廣肇兩府最酷日甚一日其害不知胡底各鄉所得自爲者脩築堤防此外別無良策議時務者謂開新興河以洩其勢而地勢高下懸殊旣已知其不可或謂毀拆圍壩以寬其入海之路此論似屬可行然河面之毀拆無幾而河底之淤積實多潦水挾泥滓以行各海道中悉多新生沙渚築之固礙流行不築亦將成洲嶼滄海桑田南海慶維則黨家譜卷三 事紀 三

此亦事之無可如何者也然嚴申厲禁此後不得再行圍築亦不至激洪流而爲虐 濱海各村落誠能實力脩築有財者出財舉事無財者負土赴工外脩隄防內謀積貯戒奢華崇樸儉庶幾上感天心凶災不作河伯不肆其威安瀾得以永奠也哉

祠後大基屬通鄉培脩不入嘗項自大基馬頭往三界廟過祠堂前至滙源里口甲辰歲培脩砌石動用約三百金俱嘗項支出三界廟入鄉大路舊參差不齊己亥冬間自廟邊至石橋頭及中道巷至北一祠將舊砌各石通身開面添補煥然一新費約百餘金內梁宅助銀二十兩餘俱廖宅捐辦通鄉往上市大路舊砌潭洲紅石日久破碎乾

隆辛亥壬子年間更換白石擎儔翁廣華翁力任其事道光丁酉重脩理至沙田林祠止費及二百餘金梁宅題銀較少餘俱廖宅捐辦由鎮南社直接沙圃村頭大路舊砌地牛小石傾跌歪斜道光乙未倡脩至甲辰始得成議路面概易新石將舊石參砌路礪共費叁百餘金是役沙圃及我鄉廖姓題銀較少多係梁宅捐辦

羽皋合定襄凡八載循聲特著道光丙申大吏將昇以卓薦遂因賀歲晉省謁見上官偶赴同寅席覺腹痛辭歸痛益劇至戌刻歿于太原公廨時正月廿二日也次日傍晚定襄有鹽販某甲在縣南門市物見騶從呵殿云是縣主回署縣衙當由南門直達而騶從故往右行甲異跡之將

南澤羅則堂家譜

卷三

事紀

七

至城隍廟問後行人役曰今此處纔是官署也甲驚顧間已失所在遂懷疑歸炊未熟忽昏絕復蘇曰縣闕一役召吾補之力辭乃免越二日而甲竟亡方甲之復醒也人以爲昏眩讖語耳至夜而羽皋訃果至邑人咸以縣主爲城隍神云是夜鼓吹喧闐城中人悉聞之羽皋未歿之前年邑中送頌德羅傘二柄一繡民之父母四字爲山長鄭恩絃舉人韓文等五百六十七人公送一繡萬民戴德四字爲世和昌永合仁各舖戶及僧民等七百七十八人公送羽皋旅櫬由武昌南還適同年勞靜庵明府令蒲圻羽皋子汝諧入見慰問之下贈百金並詩箴一持詩云故人不復見得見故人子握手道衷曲作吏貧如此爲君補行篋

可以還鄉里歲月正舒長讀書方責汝慎勿厭苦貧清白
家風美並致挽額四字曰十年清吏

鑑湖氏曰道光己丑夏夜同馬垌墅家報菴叔綺餘叔樸
存兄虞階鹿齊秋藻燦輝月湖泛舟浦江時東月方升南
風競作漁人獻鮓魚二尾肥鮮可愛乃發酷命酌移棹中
流隨波上下西望樵山暮烟半合黛影欲沈遙見無數白
鶴從林間飛出集沙洲蒲葦間或掠舟橫過東則臨水村
居長林映帶水邊罾艇數十圍坐船頭唱漁家樂歌聲隨
風吹入舟中與吟嘯聲相應時方酣飲忽見下流江心三
峯突起狀若削成風驅濤湧勢將捲壓火焰數星倏明倏
滅方駭顧間瞥旋駛至則巨艦揚帆而北也眾皆大笑更

南海虞羅則棠譜

卷三

事紀

七

酌順流至龍津墟素魄中天四望俱寂浦口汎已三下漏
移舟傍岸得椈果二株實纍纍月光映燦色如鑄金是某
肆物亟扣門索啖主人遽起延坐呼僮下果實餉客色香
味俱絕足與離支頡頏飽啖返舟月將西下是夕也舊釀
一甕幾盡報菴叔謂余曰數十年無此樂矣余時方北行
鞍馬勞頓時輒憶及此今又隔二十秋矣江月依然人琴
半杳偶一臨流爲之憮然

鄉有阿順者忘其字人輒以大獠稱之鄉中老稚無不知
大獠順者性孤而迂居恆寡儔侶人有譁笑之者不與校
而嗜潔尤癖每食必掉小舟至江心淘米因取以爲浙揭
瓶歸瓶面不取恐塵污也瓶底不取惡泥滓也炊熟輒攜

至村尾山園而食曰蠅不潔悶欲死我臨風而食何快如
之嘗病倒卧沙田村邊族人翹顯過投以藥少頃而瘥轉
詬之曰吾如此死去大好奚生爲固不以生死爲戚戚者
也

聾登貧無家室棲止村社旁喜翰墨風雪中吟哦不輟常
擁敗絮蒙頭僵卧或經日不起有過者呼之不應蹴之則
詬諄交作行乞於鄉可一頓飯卽止不爲再食計也喜屬
對有爲聯社者輒丐錢於人以投卷間亦得與高選衣履
雖敝不露髻盛暑亦不去曰吾固斯文一派也斯文之厄
至斯極矣

阿敬者性戇人以戇敬呼之彼亦常以自呼癖嗜酒得錢

南海康維則堂家譜

卷三

事紀

三

輒醉醉卽行歌於道又好博人常伺其醉而招之博以故
博常負醒卽傭工負販不憚勞苦嘗肩重負而自呼曰戇
敬汝好賭耶不賭安事此重負耶戲謔中常爲至言曰人
負汝方好汝負人卽不好矣所言輒令人思不置類多如
此又好爲吉祥語曰事事如意人皆以事事如意呼之或
至忘其原名云

事紀續

光緒丙子良寶耀赤隄被潦水齧入蟻穴搶救不及五月二日下午九點鐘始決翌晨崩決凡數十丈田廬淹沒無算及潦水退盡集款修築照田畝徵收每畝科銀十兩虛稅者半之當時續回基口共糜萬金有奇悉由本鄉籌措可謂竭力矣

甲辰水災鄰圍盡決惟大柵圍無恙是時西潦盛漲良寶一帶適當其衝搶救者數千人幸得關氏之力運椿杉器具各物始保無虞不料決口在東圍良濬沙下流隄逆流過西圍竟至波及此事之無可如何者也

乙卯夏水患尤烈亙古未有之奇災也潦水決防圍而來

南海廖維則家譜

卷三

事紀

七

隄防盡潰自西海逆流過東海溢於基面良寶沙圍先受其害日夜救護無時或息不意水勢愈急前功盡棄六月朔辰刻決沙田姑婆廟隄又決龍畔隄并決水藤楊濬兩隄一望汪洋盡爲澤國居民多扶老携幼無棲止之所哀鴻遍野滿目淒然迨潦水退盡是歲杪東西兩圍倡議合力修築各鄉族論稅畝丁口釀資又得各善堂捐助彙成鉅款於是鳩工庀材一律加高三尺培厚丈餘太祖祠前之隄維則堂另提款培厚移石砌丈餘費二百餘金基礎鞏固共慶安瀾吾儕得高枕而臥者皆維持諸君子之賜也

沙洲爲良寶四景之一在太祖祠之前下關未坤之位也

形家謂爲倒地文筆又曰進田筆黃旂岡騰涌岡兩峰對峙成峽中有沙洲以守水此關於我族形勢者也術數之說雖無足據姑記之以備考當沙洲初成時九江鄉有某君者以僞照影射意圖侵佔我鄉及沙洲鄉據理力爭得同此沙由是歸兩鄉管業鹿儕公宦遊時聞此沙崩決卽自捐資寄回二百金培築完善不料光緒年間此沙復決矣星周公倡議在維則堂撥款修築費二百餘金至今閱二十餘年又被潦水衝陷重修以復舊觀是所望於來哲矣

甲寅庚申兩年曾商議建造絲傷嗣因集款無成遂作罷論辛酉夏初賀豐進士里廖遠在介紹官山均利絲傷來

南海廖維則家譜

卷三

事紀

六

本鄉擇地建築鄉人集祠會議全族贊成派代表往省與均利磋商遂有成議惟本鄉涌口淤塞每至冬令卽無生水入涌難於輸運議由本鄉出資鑿深各代表力負其責是年十月初九日均利來祠立約擇定街口坊前桑基魚塘建築工場

本鄉涌口至三界廟海邊一帶自光緒初年日漸淤塞加以連年潦水挾沙坭而來至本村前面遂成洲嶼滄海桑田亦事之無可如何者也故舊涌口非人事財力所能復開改由賣外基墾舊址開浚百數十丈至新沙豐字號出海核計工程爲數頗鉅而五坊公箱又無嘗款可存祇得向各殷戶揭銀一千九百餘元始克舉事當時力任其難

者景廉華幹祥和祥光哲明茂倫及各坊正之力也自涌口開通之後均利卽陸續轉運材料興工建造至壬戌年四月落成從此吾鄉婦女生計有資不必沐風櫛雨奔走於鄰鄉矣

大祖寢室爲白蟻所蝕勢將傾頽辛丑冬合族紳耆籌款重修壬寅落成演劇慶祝誠美舉也惟祠左南便新闢花園一所西貼祠首東貼基闊約數丈前座大廚房中座花園後座書室工程旣竣族中多事內則闢牆之禍外則官訟纏綿被官罰欵者被人牽累者小故釀成大變者層見叠出焉族人驚駭均謂祠左之南園有礙風水民國九年老少集祠議決拆毀自是族運日隆訟事不作民國十年九月絲偈成立十一月對海磚窑成立祖嘗豐裕比之昔日一得一失有天淵之隔矣祠前之大地有蛤人多獲之自建造祠左南園之後蛤遂絕跡休咎之徵可見矣族人其慎之毋誤犯也

牛墟步頭向歸賀理兩鄉管業其渡租爲七甲基圍修基之用民國四年由葛岸水藤等五堡局紳及賀理兩鄉紳耆立碑以垂久遠茲錄其碑文如左

鄉之東北有古渡焉相沿爲牛墟渡頭者是鄉族所載自明代梁郡侯始公諱煥號堯宇隆慶庚午科舉人歷宦至福建郡武府同知公潔已多義舉積有步頭稅地其稅載在順德都粘圖九甲梁炤戶不自享有歸之闔鄉公共物鄉人德之迄夫前清道光初年綿市暢旺時有廖凌秀者因鄉人往省購花每遇風雨附搭不便於是創設花艇而附載者日益衆唯時梁佐昭潘宣猷廖成芳諸前輩改建糧米艇二艘一由牛墟往省一由省回牛墟每歲得步頭

租額收入賀理兩鄉七甲文會及修基公費無如七甲基處東圍之上游當兩江之衡要其地點有七株榕者縣志載爲最險每遇潦漲搶救失措由是而牛墟渡租始歸併七甲基圍之用而危基得賴以安故我鄉向於寅月十有八日例鄉飲凡梁郡侯子孫皆得赴席誌不忘也後人希圖壟斷風潮叠起至光緒八年南街該人梁和順渡夫欲以近地影佔亂承縣餉事蒙廣州府馮南海縣袁草退給示另充在案此牛墟廣府餉渡所由來矣然而事既寢息詎野心未死去冬該族人等復執批步頭傍地領約其領約內有立明租步頭傍邊字樣與上房梁族冒爭步頭香油銀兩藉此起點冀爲將來網佔後盾嗣由東西兩圍務

公所同人和平解決酌量將每年香油銀八兩內扣出七錢二分交回上梁輸納糧務餘銀七兩二錢八分給與南街梁清芬堂日後永不加增此牛墟埗頭照舊永歸賀理兩鄉七甲一帶任由永遠灣泊通行不得設他渡攙奪事既兩造遵處當經東西圍務公所邀集五堡同人立明協約交與梁姓上下兩房收執復令泐碑爲記并誌之以垂不朽

民國四年二月吉日五堡同人陳文蔚區應庚馬鑾光區應煊岑伯著羅偉三 賀理兩鄉廖景曾廖景桐梁樵一潘錫蕃潘佳宏陸明樂梁總覺霍感應同立